

神州醫學社新編

薛生白醫案

上海廣文書局出版




南京中醫藥大學圖書館版權所有

中華民國十年十月再版

薛生白醫案（全一冊）

價洋三角



編輯者

陸士

印刷者

上海世界書局

發行者

上海廣文書局

總發行所

上海四馬路

世界書局



南京中醫藥大學圖書館版權所有



序

薛生白徵君。文徵明甥也。名雪。字生白。自號一瓢子。生白因母文夫人多病。始究心醫術。其醫與葉香巖齊名。當時號稱葉薛。吾國醫學。自明季以來。學者大半沉醉於薛院使張景岳之說。喜用溫補。所誤甚多。獨生白與香巖大聲疾呼。發明溫熱治法。民到於今受其賜。顧世傳二人在醫局會診。因治一更夫。仁智偶歧。遂生意見互相抨擊。甚至避道。葉建小齋。顏曰掃雪軒。薛亦築掃葉山房以報之。此種舉動。類於邨嫗相詈。葉薛名家。決不有此。意必傳者之過也。而薛氏醫案。如鳳毛麟角。彌見珍貴。溫熱贅言。載薛生白治風溫症。熱渴煩悶。昏瞶不知人。不語如尸厥。用極明雄黃一兩。研極細。入銅

勺又研。提淨牙硝六錢。微火鎔化。撥勻如水時。急濾清者於碗粗渣不用。凝定。以陳雨水十碗。內取出一碗。煎木通一錢。通草三錢。傾入九碗冷水。又取犀角磨入三錢。或旋磨旋與亦可。每碗約二三分。再將製雄挑二三釐入碗。冷與服時時進之。盡必有清痰吐出數碗而愈。十救七八。是法。余用之良驗。則知先生醫案之可貴矣。臨證之暇。特將先生醫案分類校訂。並附錄香巖案以資對照。使讀薛案者得於薛案外。更有所益也。且使後人知兩名家學識如是。決無互相抨擊之謬舉。是則於兩先生或不無稍補乎。

民國八年十月

後學珠街閣陸士諤謹序於松江醫寓





# 薛生白醫案目錄

- (一) 風
- (二) 痺
- (三) 血
- (四) 鬱
- (五) 厥
- (六) 欬
- (七) 哮
- (八) 膈
- (九) 癥
- (十) 積
- (十一) 虛損

一 至 三  
 四 至 七  
 七 至 九  
 九 至 十  
 十 至 十三  
 十三 至 十四  
 十四 至 十六  
 十六 至 十七  
 十七 至 十八



目錄

(十二) 失音

(十三) 脾胃

(十四) 遺精

(十五) 瘡

(十六) 濕

(十七) 感冒

(十八) 雜病

(十九) 調補



六至壳

七至壳

# 薛生白醫案

## (二) 風

鬚眉白落。皮毛淖澤。脈來浮濇。此風也。非衰白也。三十六種同出異名。非淺可之疾。夏月宜食香風蛇。即俗名黑風蛇也。與雞煮食之。諤按此乃癘風也。

白歸身 胡麻 赤芍 生地 旱蓮草 殭蠶 銀花 菴蔚子 夏枯草

頭痛窅不見人。為一忌。肝風嘔吐胆汁。為一忌。相與有年。知己惟此一人。豈面坐視。務得挽回為妙。然固有數存焉者矣。

溫胆湯。去枳實。加天麻。鈎藤。桑葉。

是証究屬肝風。則厥陰一經。未易制也。在古法。有鎮攝一法。有培土禦之一法。所以東垣有半夏天麻湯。而景岳又撰左歸。以補其闕略。今二法皆不能純用之矣。擬出入一方。備采。

人參 焦朮 茯苓 柏子仁 半夏 陳皮 熟地 白歸身 炙草 鼈甲

明係肝風上冒。左尺脈碎亂搏指。此乙癸同源。腎肝同病也。但少陰之脈。不至於顛。惟厥陰能至。以肝為重。腎次之。

羚羊角 生地 半夏 白芍 當歸身 陳皮 茯苓 菊花 女貞子





診得真氣久不週於四肢。又暴受暑邪類中。遺溺目瞑。脈弦數而上承魚際。肝風為足厥陰。暑風為手厥陰。手足兩經得病。瘖而不能言者。不治。且移至近地涼處為病室。外解暑邪。內用對症之藥。以救其逆。

羚羊角 竹茹 連翹仁 鮮桑枝 半夏 鮮石菖蒲根

特將葉香巖先生治風驗案附錄於下以資對証

又有年冬藏不固。春木萌動。人身內應乎肝。水弱木失滋榮。陽氣變化內風。乘胃為嘔。攻脇為痛。仲景以消渴心熱屬厥陰。內經以吐涎沫為肝病。肝居左而病熾偏右。木犯土位之徵。經旨謂肝為剛臟。非柔不和。閱醫藥沉桂莢連。雜以破泄氣分皆辛。辣苦燥。有剛以治剛之弊。倘忽厥逆癉瘵奈何。議鎮陽熄風法。

生牡蠣 阿膠 細生地 丹參 淮小麥 南棗

又內風陽氣鼓動變幻。皆有形無質。為用太過。以議鹹苦入陰和陽。佐麥棗以和胃。制肝獲效。蓋肝木肆橫。胃土必傷。醫治既僻。津血必枯。唇赤舌絳。咽乾穀味即變酸。膩顯是胃汁液劫。胃陰不復。夫胃為陽明之主。非陰柔不肯協和。與脾土有別故也。

生牡蠣 阿膠 細生地 炒麻仁 炒麥冬 炙草

心悸如饑。頭暈肢麻。此乃內起肝風。汗多淋漓。氣弱陽洩。近日肌浮腹大。木傳土也。倣丹溪養金制木。使脾少賊邪之害。



阿膠 天冬 生白芍 細生地 麥冬 明天麻 菊花炭

肝風不熄。都因天熱氣泄。高年五液皆少。不主涵木。身中衛陽亦少擁護。遂致麻木不仁。丹溪所云。麻屬氣虛。血少便艱也。苟非培養元氣。徒以痰火風為事。根本先怯。適令召風矣。議用三才湯。合桑麻。滋肝養血熄風治法。

天冬 地黃 人參 胡麻 桑葉 首烏 生用

上年起病。食物不甘。頭暈耳鳴。足力痿軟。年周甲子。向老日衰。下元元氣漸漓。水乏生木之司。液少則肝木內風鼓動。木乘胃土。必食無味。風陽上攻。顛竅上實。下虛。醫為腎虛。莖地填陰。原不為過。但腎水內腐。真火宜溫。肝木相火宜涼。凡益腎取乎溫養。必在涼肝以監制。方無偏黨。是症倘加暴怒煩勞。必有卒中之累。戒酒肉濁味。上氣肅清。填下。無痰火阻礙。清閒怡悅。五志氣火不燃。內起之病。關係臟真。不徒求於藥也。

熟地 石斛 天冬 菊炭 巴戟肉 肉蓯蓉 沙蒺藜 沙白芍 懷牛膝

線魚膠 蜜丸打入青鹽四兩

脈沉而遲。向有寒疝。泄瀉。繼而腸血不已。漸漸跗膝麻木無力。此因膏粱酒醴。釀濕內著。中年腎陽日衰。肝風肆橫。陽明胃絡空乏。無以束筋。流利機關。日加委頓。乃陽虛也。做古劫胃水法。



生茅朮 人參 厚樸 生炮附子 陳皮  
高年氣血皆虛。新涼上受。經絡不和。腦後筋掣牽痛。陰氣安靜。乃陽風之邪。議用清散輕劑。

新荷葉 青菊葉 連翹殼 藁本 苦丁茶

陽不交陰。寤不成寐。內風乘巔。髓出鼻竅。腥濁。必絕欲經年。可以却病。乃下焦病根。歸脾湯永無效期。倣丹溪法。

淡菜 阿膠 熟地 龜版 茯神 天冬

某陽明脈絡空虛。內風暗動。右肩胛及指麻木。玉屏風散。加當歸。天麻。童桑。

俞氏寡居一十四載。獨陰無陽。平昔操持。有勞無逸。當夏四月。陽氣大泄。主令。忽然右肢麻木。如墮不舉。汗出麻冷。心中卒痛。而呵欠不已。大便不通。診脈小弱。豈是外感病象。似乎痺中。其因在乎意傷憂愁。則肢廢也。攻風刮痰之治。非其所宜。大旨以固衛陽為主。而宣通脈絡佐之。

桂枝 附子 生黃芪 炒遠志 片薑黃 羌活

包老年隆冬暴中。乃陰陽失交本病。脈左大右濡。內風掀越。中陽已虛。第五日已更衣。神憊欲寐。宗王先生議。陽明厥陰主治法。以候裁。

人參 茯苓 白蒺藜 炒半夏 炒杞子 甘菊





某陽明虛。內風動。右肢麻痺。痰多眩暈。

天麻 鈎藤 半夏 茯苓 廣皮

(二) 痺

人身之脈。胸走手。腹走足。八十文週於一身。未有沉寒傷筋之損。而不及於下者。先後異時。為患則一。非鮑姑之艾。文伯之針。不能愈。內服八味湯可也。

附錄葉香巖案以資參考

五旬有四。陽氣日薄。陽明脈絡空乏。不能束筋骨。以流利機關。肩痛肢麻。頭目如蒙。行動萎弱無力。此下虛上實。絡熱內風沸起。當入夏陽升為甚。滲濕利痰。必不應病。議清營熱。以泄內風。

犀角 鮮生地 元參 連翹 桑葉 丹皮 天麻 鈎藤

下體痿躄。先有遺泄濕瘍。頻進滲利。陰陽更傷。雖有參芪朮。養脾肺以益氣。未能救下。即如畏冷陽微。飯後吐食。乃胃陽頓衰。應乎衛外失職。但下焦之病。都屬精血受傷。兩投溫通柔劑。以腎惡燥。久病宜通任督。通攝兼施。亦與古賢四筋健步諸法互參。至於胃藥。必須另用。夫胃府主乎氣。氣得下行為順。東垣有升陽益胃之條。似乎相悖。然苓連非苦降之氣乎。凡吐後一二日。停止下焦血分藥。即用扶陽利胃二日。俾中下兩固。經旨謂陽明之脈束筋骨以流利機關。本病即有合矣。



鹿茸 歸身 柏子霜 茯苓 菴蓉 巴戟 補骨脂 川石斛 牛膝

枸杞子 吐後間服大半夏湯加乾薑薑汁

再診長夏濕熱經脈流行氣鈍兼以下元絡脈已虛痿弱不耐步趨常似酸楚大便

或結或澹都屬肝腎為病然益下必佐宣通脈絡乃正治之法恐夏季後濕熱還擾

預為防理

歸身 熟地 桑椹子 巴戟 遠志 茴香 酒蒸金毛狗脊 水熬膏

三診痿躄在下肝腎居多但素飲必有濕熱熱痰濕滯氣血不行筋縮肌肉不仁體

質重著不移無非濕邪之深沉也若論陽虛不該大發瘡痍但病久未可速攻莫計

效遲方可愈也

細生地 歸身 黃柏 萆薢 菴蓉 川斛 牛膝 蒺藜

四診寢食如常脈沉而緩獨兩腿內外肉脫麻木年逾五旬陽脈漸衰躄維不為用

事非三氣雜感也溫通以佐脈絡之流暢仿古聖四飭金剛之屬

菴蓉 牛膝 茯苓 萆薢 木瓜 枸杞子 蒺藜 金毛狗脊膏丸

楓橋四十三此肝病也肝屬木主筋木藏內寄風火情志不適熱自內起燥筋襲脈

肢體為之牽強不舒惟怡悅靜養可布漸愈藥無除根之理

何首烏 枸杞子 桑寄生 當歸身 杜仲 沙苑蒺藜



沐陽五十四住居臨海。風瘴癘氣。不似平原人衆稠密處。瘴癘侵入腦體骨節。氣血不和。漸次壅遏上蒸。頭面清陽痺阻。經年累月。邪正混處其間。草木不能驅逐。憑理而論。當以蟲蟻向陽分疎通逐邪。

蜣螂一兩 仙靈脾五錢 蜂房五錢 川芎一錢 火酒飛麩泛丸

奔走煩勞。暴熱上蒸。致身中陽氣不交於陰。四肢麻木。內風屬陽之化。左屬肝。肝性剛。柔劑為宜。若用酒藥。益助其動陽。是矛盾矣。

生地 天冬 白藕汁 沙蒺藜 桑寄生 女貞子 炒枸杞 川石斛

肩背肢末。皆陽氣游行之所。牽掣不和。是絡脈中病。首用東垣舒經。接用參芪。或附兩法不應。必容氣襲入脈中。灸刺無功。議用酒醴通和血脉。

鑽地風五兩 千年健五兩 大黑豆六兩 三味投入無灰酒十斤。隔水煮一

日。早晚暖服三四盃。

當風受涼。遂致左偏麻木。已經三載。今年勢緩。痛聚於腰。寒冷煩勞痛甚。此氣血凝遏。壯年不為大害。議以酒醒之。是治風先治血之意。

當歸 沉香 川芎 松節 生於朮 海桐皮 片薑黃 黃芪 桂枝

羌活 沒藥 虎脛骨

(三) 血





弦勁無情之脈。即名胃少。雖非難經所謂。但弦無胃。而久病有此不宜。莫因失血。而久進純陰之藥。陽氣抑而陰無所恃也。拙見且進甘溫。

建中湯。加人參。炙綿芪。歸身。

病在奇經。治他經不應。要知血行清道。便知清氣不肅。所以鼻紅昏暈。二者皆出督脈。好異無用。以古法治之自效。

生地 犀角 廣元核 側柏葉

右蜜丸。早服五錢。晚服三錢。開水送下。

右脈孔搏耳聾。血下溢。寒熱不已。陰絡所傷。而厥陰不攝。當從至陰中宣出熱邪。是存陰第一義也。

白知母 青蒿 生白芍 炒黃柏 鱉甲 鮮荷葉 元米一合 炮湯為水

稟質既薄。效紅極易傷陰。不可理肺。緣水出高原。肺主氣母。藉以生津液。週環百脈故也。

生地 清阿膠 枸杞子 料豆皮 麥冬 百合

陽極升而不入。陰鬱沉而不附。是以有晝無夜。離明當午而睡。水漸衰矣。治以交陰。陽引衛入營。母以血家忌半夏也。

半夏 酸棗仁 生地 生甘草 糯米 茯苓 朱仁 去油乳香



特將葉香巖醫案附錄於下。以資對照。

懷抱抑鬱。營血受傷。入暮腕痛喜按。乃傷陰絡。非實痛也。

柏仁 桂圓 茯神 遠志 廣皮

精氣不足體質。再加思慮鬱結。心脾營血受傷。口味甜。血隨溢。稍過飢。腕中痛。營血中焦。宜以歸脾營養之屬。

人參 大棗 遠志 茯神 甘草 歸身 白芍 桂圓

望色萎黃少膏澤。按脈弦促而芤。納穀不旺。病已數年。每春夏陽升氣泄。偶加煩冗。情志不適。血必溢出上竅。中氣非少。壯陰火相同。夫心主血。脾統血。肝藏血。藏陰內虛。陽動乃溢。常服歸脾湯。去耆朮木香。加白芍以和肝脾之陰。所謂王道養正。善藥不計驟功。

人參 茯神 炙草 歸身 白芍 甘草 桂圓

寅卯少陽內動。絡中血溢。寒熱嘔逆。驟然泄瀉。不能左卧。蓋陽木必犯陰土。胆汁無藏。少寐多寤。土藏被剋。食減無味。宜補土疎木。

人參 山藥 炙草 白朮 扁豆 丹皮

努力絡傷身痛。痰嗽失血。最宜降氣通痰。最忌沉寒呆補。

紫降香末 鬱金 茯苓 米仁 蘇子 桃仁 入韭白汁十五匙。



怒傷肝。恐傷腎。二志交併。真藏內損。煩勞則陽氣擾動。值春木之令。絡血隨氣上溢。失血過多。陰氣下空。陽無所附。上觸清府。致木反乘金。咳嗆氣促。肺俞惡寒。脈弦數。乃下損之疾。

山萸肉 五味子 鹹秋石 青鹽 熟地

入冬天暖。陽不潛伏。質瘦脂虧。稟乎木火。血液既少。內風暗動。遂致暈眩。麻痺。陡然仆倒。水不生木。肝陽橫逆。絡血流行右阻。謂之偏枯。忌用攻風逐痰。清邪涼藥。漸致其和。交節不反。原可扶病延年。

犀角 羚羊角 鬱金 元參 連翹心 鮮菖蒲 川貝母 橘紅

自失血半年以來。心悸怔忡。脇左時動。絡脈空虛。營液暗傷。議甘緩平補。

酸棗仁 柏子仁 桂圓肉 生地 茯神 杞子 炙甘草 飢時服。

脈細無瀉。氣衝失血。寐欲遺精。令納穀不運。神思日倦。緣操持太過。上下失交。當治中焦心脾之營自旺。諸症可冀漸復。偏熱偏寒。都是斷喪真元。

人參 歸身 於朮 廣皮 棗仁 茯神 白芍 炙草

當夏四月。陽氣大升。體中陰弱失守。每有吐衄神煩。已交夏至。陰欲來復。進甘藥緩補。所謂下損不得犯胃也。

熟地 蓮肉 炙草 山藥 茯神 芡實 阿膠 柏子仁



推年吐衄。熱傷為多。今脈小肌鬆。食少胃虛。陽升已露一斑。進甘涼益胃方。

炒麥冬 生扁豆 北沙參 茯神 木瓜 炙草

秋暑失血。初春再發。脈右大。頗能納食。金匱云。男子脈大為勞極。虛亦為勞。要知脈大為勞。是煩勞傷氣。脈虛為勞。是情欲致損。大致病根。驅盡安靜一年可愈。

炙綿芪 炙草 北沙參 白芨 苡苳 南棗

據述病原。朝寒暮熱已止。血逆已平。稍見喘咳。近日復有惡寒發熱。此因內虛成瘧。尚且小心。

製首烏 川貝 茯苓 白芍 甘草 丹皮 柴胡 廣皮

右寸浮數。餘脈虛瀼。失血寒熱已止。但喉中作癢。咳嗽。大便又不堅固。此脾肺俱虧。正在潤肺礙脾。補脾礙肺之時。清心靜氣。病可漸卻。至囑。

川貝 丹皮 玉竹 茯苓 生地 甘草 牛膝 橘紅 北沙參

李雲生 咳甚。嘔血吐食。肝病犯胃。陽氣升逆所致。

代赭石 新絳 茯苓 丹皮 旋覆 黑山梔

血症發後。體虛氣弱。暑氣外侵。而寒熱腰痛。飢不欲食。雖咳嗽未減。當治其本。即急則治標之義也。

香薷 扁豆 木瓜 厚朴





便後純血。食減力疲。脈左堅。是中年陰虧。

熟地 炒白芍 當歸 肺餅炭 炙甘草

腸血腹脹便澹。當臍微痛。脾胃陽氣已弱。能食氣不運。濕鬱腸胃。血注不已。考古人如羅謙甫王損庵輩。用刮胃水法可效。

真茅朮 紫厚樸 升麻炭 炙甘草 附子炭 炮薑炭 炒當歸 炒白芍

煨葛根 新會皮 以黃土法丸

酒毒內燔。吐血甚多。六七日後。瘀血又從大便出。酒性先入肝胆。次及胃絡。照一臟一腑對治。勿驟用膩滯陰藥。

金石斛 丹參 檣豆皮 銀花 地骨皮 丹皮 黑山梔 雲茯苓

山西三十九。夏季吐血。秋深入冬頻發。診脈右弦空。左濡。是形神兩傷。絡血不得寧靜。氣血因經營而耗。不比方壯矣。

黃芪建中湯

開方橋二十九。織按肢體皆動。過勞則氣血不流。偏倚為病。在左脇痛。失血。肝絡傷

瘀發久必重。

炒桃仁 延胡索 降香末 炒丹皮 鈎藤勾

無錫二十二。嗽血。秋季再發。夜熱汗出。全是陰虧見症。大忌肺藥理嗽。絕欲百日。助



其收藏胃口尚好。腎肝陰藥中。必佐攝納。

熟地 五味子 山藥 芡實 湖蓮 茯神

無錫三十脇痛失血。以柔劑緩肝之急。

炒熟桃仁 柏子仁 當歸尾 炒黑丹皮 鉤藤鉤

牙宣春發。繼以喘促。乃腎虛不能納氣歸元。戌亥陰火。寅卯陽動。其患更急。閱古

書。則用黑錫丹養正丹之屬。平時以溫暖下元諸法。

人參 熟地 五味子 胡桃肉 熟附子 舶茴香

獨糞後血未已。是為遠血。宗仲景金匱例。用黃土湯。

黃土 生地 奎白芍 人參 清阿膠 川黃柏 歸身 泡淡附子

秋暑失血。初春再發。脈右大。能納食。金匱云。男子脈大為勞。極虛亦為勞。要知脈大

為勞。是煩勞傷氣。脈虛為勞。是情慾致損。安靜一年可愈。

黃芪 北沙參 南棗 白芨 炙草 薏苡仁

奔馳氣火乘絡失血。用繆氏氣降使血歸經。

蘇子 茯苓 丹皮 降香 米仁 芫蔚子 桃仁 藕節汁

同里五十六酒熱深入血分。痰嘔盈盆。越六七年。病變反胃。妨食。嘔吐涎沫。問大便

仍通。結閉止在中脘。先宣通痰開閉。



韭白汁 金墨汁 生桃仁 生蒲黃 延胡索 片薑黃  
積勞陽動。氣蒸上咳。已三四年。仍然經營辦事。夏四月。地中陽升。遂失血。咽痛音低。  
男子五旬以外。下元先虧。此顯然五液不充。為久延不愈之沉疴。見血見嗽。與寒降  
清肺。是芬極者。

生地黃 清阿膠 雞子黃 雲茯苓 麥冬 桔梗

問病起於功名未遂。情志鬱勃。人身之氣。左升右降。怒必木火暴升。肝膽橫逆。肺反  
為木火乘侮。全無制木之權。呼吸病加。絡血被氣火擾動。亦令溢出上竅。更加勤讀  
苦工。身靜心動。君相何由以寧。春夏頻發。地中氣升。陽氣應之內起之病。關係臟真  
情志安和。度病可卻。

丹皮 鉤藤 金斛 白芍 米仁 蘇子 藕汁 真降香

陰液損傷。陽氣上冒。衄血效痰。理宜和陽存陰。冀津液稍復。望其轉機。至於疏滯解  
表和表諸法。自然另有高見。非敢參末議也。

秋石拌人參 阿膠 鮮生地 麥冬

(四) 鬱

佞佛之人多嗜。積鬱之人多火。久而久之。拂鬱之性。颺發波掀。若狂若鬼。藥石既不  
能與。先與丹藥。焚於室中。以辟易其狂悖可也。



如意丹七丸

抑鬱頓挫。侘僚無聊。心乃偏倚。十二官皆無主。則陰氣并於陽也。投以重鎮之劑。

生鐵落 鬱金 半夏 苦參 橘紅 塊苓

附錄葉香巖茶以資對照

經營不遂。情懷拂鬱。少火化為壯火。風木挾陽上巔。眩暈不寐。是陽不入陰。非陰虛也。如果純虛。豈能由春及秋。仍能納食驅馳。今忽然中脘噎阻。由藥傷胃。自胃陽上逆使然。溫胆湯加減之。

陳皮 茯苓 丹皮 梔皮 半夏 枳實 桑葉 竹茹

某寡居多鬱。宿病在肝。通日暑邪深入。肝病必來犯胃。吐衄下痢得止。不思穀食。心中痰熱。仍是肝胃本症。况暑濕多傷氣分。人參輔胃開痞。扶胃有益。幸無忽致疲可也。

人參 川連 半夏 薑汁 枳實 牡蠣 又胃開思食。仍以制肝和胃。

人參 金石斛 半夏 枳實 茯苓 橘紅

脈瀆小數。質弱。平昔喜飲。酒性先入肝膽。故易生嗔怒。且塗次侍親煩勞。鬱熱自情懷而升。病屬鬱勞。宜怡悅為上。用藥不易奏功。

桑葉 川貝母 粉丹皮 山梔殼 天花粉 蜜炒廣皮



陰莖作痛。痛甚而憤。診兩脈浮虛而濇。浮為氣虛。濇乃精傷。陰陽兩虛。得之憂思勞鬱而傷中也。經云。陽明為氣血之海。主潤宗筋。又陽氣者。精則養神。柔則養筋。今多悒鬱。則氣必傷。又任勞倦。則血必耗。氣血兩傷。宗筋失潤。故令作痛。治以當歸補血湯加。

人參 甘草 秦莖 桂心 紅花 繼用歸脾湯調理。

再錄馬元儀治鬱醫案。以資借鏡。

此因客邸思家。肺胃之氣鬱而不宣。鬱久成火。胃中津液日就消燦。有失升降之常。上下不交。而成痞塞矣。今之治法。宣通肺鬱。則清肅下行。而燥火可除。滋養胃元。則津液四佈。而升降自如矣。

紫苑 瓜蒌仁 枳殼 桔梗 杏仁 蘇子 半麩 鬱金

場屋不遂。鬱鬱而歸。神識不清。胸滿謔語。上不得入。下不得出。脈虛濇兼結。此因鬱氣所傷。肺經清肅之氣不能下行。而反上壅。由是木寡於畏。水絕其源。邪火為之內擾。津液為之乾枯。胸中結滿者。氣不得下也。神昏謔語者。火亂於上也。上不得入。下不得出。氣化不清。而顯天地否塞之象也。法宜舒通肺氣。使清肅下行。則邪火不擾。而胸滿自愈矣。

紫苑 乾葛 枳殼 桔梗 杏仁 蘇子





脈上出魚際。此情懷失曠。鬱而成熱。少火化為壯火。久效食減形瘦。已是損象。議用  
逍遙散。養心脾營血。舒肝胆鬱結。主治。

當歸 白芍 茯苓 甘草 丹皮 柴胡 鉤藤 廣皮 大棗

憂勞抑鬱。肝木日橫。胃土受剋。蓋司納主胃。必須脾陽鼓動。方得運化耳。今也有形  
氣衝。必得噯氣以流暢。丹溪所云。上升之氣。自肝而出。其為肝木侵犯脾胃。何疑。所  
以納穀竟日。仍上湧出口。昔賢云。噎膈反胃。本乎陰枯陽結。良由上逆不下。腸中乏  
津以潤濡。腕中氣痺不行。漸至窄隘。不堪容物。謂之關格。極難治療。須閱調攝諸方。  
或以鎮墜殺蟲。或以辛香耗氣。殊不知氣洩。則津液更枯。鎮重。則清陽欲寂。近代喻  
嘉言。法律以申明之矣。夫曰反者。陰陽錯綜之謂。不以順而逆理。徒以補漏為法。經  
年之恙。望六之年。生氣日奪。吾恐春木生發正旺。而病加純陽之令。而病劇。據理若  
是。同志以為然否。

人參 黃連 淡附子 淡薑 茯苓 甘草

(五) 厥

厥有十四。洩為一法。鎮為一法。蓋因曲直太過。不特下侮土。并其上不畏金。鎮法恐  
其格不相入。宜因其勢而利導之。然後潤之。滋之。則有不濟者。

羚羊角 金鈴肉 生甘草 淡吳萸 黑檮豆 生白芍 雲茯苓



川鬱金汁

譯按葉香巖治厥醫案。堪與薛案對照。附錄於下。

肝陽化風為厥。腎液下衰。水不生木。而藏納失職。此壯盛年歲。已有下虛上實之象。大意養腎主以溫潤。治肝須得清涼。乃仿複法之方。

大熟地 茯苓 遠志 茯苓 鹿茸 柏子仁 補骨脂 懷牛膝 黃柏

天冬 精羊肉煮爛。搗為丸。

怒勞陽升暴厥。苦降和陽。使精神不為濁蒙。便可清爽。此論平時調理。養肝腎之陰。宜至靜之劑。從經旨下虛上盛主治。

生地 熟地 龜版 菖蒲 遠志 茯苓

厥者。脈動而身靜。謂之尸厥。此氣閉於外。氣血未亂。通其陽則生。今厥而脈亂。氣血併走於上。如天地之鬱。則沙飛水湧。莫之可當。謂之大厥。此人身之根底空虛。三陽并羸。俟其氣返則生。不返則危矣。

大熟地 磁石 代赭石 五味子 白芍 人參 河車

此肝風挾陽。上逆為厥。得之惱怒驚憂。屬七情之病。厥陰肝脈貫膈乘胃。是以脘中不饑。不思納穀。木犯土位也。其頭暈目眩。亦肝風獨行至高之地。而精華之血。不能營矣。前用苦降酸泄辛宣。病有半月不愈。議兼重鎮主之。



川連 吳萸炒 白芍 烏梅 淡乾薑 生牡蠣  
此厥症也。緣情懷失曠。肝膽鬱勃。陽氣直上無制。夫肝脈貫膈入胃。循遠咽喉。今病發由腕至咽。四肢逆冷。所云上升之氣自肝而出。中挾相火。其病為甚。法以苦降酸泄。辛宣之治。使陽和氣平之後。接續峻補陽明。此病發必稀。以胃土久受未戕。土虛則木易乘剋也。

川連 生芍 吳萸 烏梅 橘紅 杏仁

診脈左虛大右濇小弱。症見目暝短氣遺尿肢掉神識漸迷渴不欲飲。浸早稍安。時煩躁。此乃積勞元傷熱氣內迫。劫爍臟液致內風欲擾。有痙厥之慮。仲景謂元氣受傷致病。當與甘藥。就暑熱傷氣亦屬發泄所致。東垣發明內傷暑病益氣諸法。足為炳據。若動攻表裏。是速其散越耳。

麥冬 生甘草 鮮蓮子 知母 竹葉心

(六) 效

十二經皆有效。胃病安得不效。况此土病於金藏。而府亦病。於此面求其吐與瀉。一在於胃之上脘。一在肺之府。所以無從踪跡也。仰屋圖維。必須分兵合剿。乃得擬一法。請諸道長。以此而益精之。或葛藟可採。為蝦力於行舟何如。

江西赤石脂 六兩 煨 炒黑乾薑 二兩 二味為末。黃米飯為丸。



人參一錢 炙黑甘草一錢 大棗五錢 飴糖五錢 桂木一錢 酒炒白芍二錢  
煨熟生薑一錢 水煎一次去渣送前桃花丸三錢

內經謂骨肉柔脆之人其質本弱然以脈症較之其咳原屬手太陰得之聞先一人  
補之後一人瀉之邪則從補而升元則從瀉而虛竟成廟兵出而岸兵入也亦參末  
議共博一笑

北沙參 燕窩 川貝母 桑葉 冰糖 紫苑

蘇綠國貢使契苾丹副使阿石丹久效不能卧案辨八方之風測五土之性大率貴  
邦偏在中華之巽上箕尾之前翼軫之外陽氣偏泄即有風寒易感易散來此中華  
已屬三焦况不得卧下肺氣大傷止宜潤降而已

蜜炙枇杷葉 麥門冬 川貝母 甜杏仁 經霜桑葉 米仁

久效移邪犯胃因效而肺肅無權遂致升逆勿用瀉損肺氣之藥

水梨去心帶皮搗爛絲綿濾清慢火熬成膏收入磁罇內蠟封口每日開水送下  
五錢

此由金水不相承挹故效久不愈切勿理肺肺為嬌藏愈理愈虛証不可泛然滋陰

北沙參 整玉竹 雲茯神 川石斛 生扁豆 甜杏仁

形忽漸瘦脈虛極氣怯偶效目黑微眩忽忽不樂補血人所知也宜將陰獸引入陰



中藥猶得力。早晚捕獺一頭。取肝陰乾。用鹿角膠。各於木器杵碎。早服鹿角膠末一錢。晚服獺肝末一錢。皆開水送下。此常用百日之法。今擬煎方先服。

人參 茯苓 兔絲餅 南棗 焦冬朮 炙草 枸杞子

右脈一息七至弦。左脈一息六至緊。欬而不得息。陰氣已弱。金水同受病。且議景岳六君煎投之。

金水六君煎

素有喘症。形氣怯弱。咽痛不腫。時欬。此新感風溫在肺。氣不下肅。尚宜清降。

桑葉 白沙參 塊茯苓 杏仁 川貝母 南棗肉

附錄葉香巖案以資對照

脈虛數。喉乾舌燥。欲欬。乃陰虧於下。燥爍於上。非客病也。

生地 熟地 天冬 麥冬 扁豆

咳嗽肉消。老弱腎病。食入腹脹。大便稍利。勢減。兼之晝甚夜輕。據是氣分陽府失宣。徒執虛治不效。經云二虛一實者。偏治其實。開一面文也。據經以疏方。

米仁 茯苓 澤瀉 杏仁 寒水石

脈細欬逆。不得側眠。肌消色奪。經水已閉。食減便澹。久病損及三陰。漸至胃氣欲敗。藥力難挽。擬進建中法。冀得胃旺納穀。庶幾帶病延年。





建中湯去薑

王公美脈沉而欬。不能著枕而卧。此老年下元虛。氣不攝納。濁氣痰飲皆為陰象。乘暮夜陰時寐發。發散清潤皆非。當以小青龍法。開太陽經。撤飲下趨。

小青龍去麻辛草

熱緩神昏。欬痰嘔逆。舌不能言。餘邪漸入心包絡。恐癰痰。進芳香入絡法。

萬氏牛黃丸

穢濁不正之氣擾中。痞悶惡心。頭疼煩渴。形寒內熱。邪不在表。未可發散。

杏仁 薑皮 白芍 通草 白菴 鬱金 花粉 連翹

汪裕當喉癢咳甚。形寒忽熱。今早便澹。卧醒咽乾。不為口渴。議養胃陰以供肺。

扁豆 北沙參 南棗 元米湯煎

酒客伏濕。脈數汗多。咳嗽。食不易運。病在手足太陰。

茅朮 扁豆 米仁 桑皮 杏仁 半夏 茯苓

欬嗆頻多。必嘔吐涎沫。明理者當知咳嗆起自衝脈。氣沖不司收攝。為肝腎陰氣不

足。咽喉久痛者。緣少陰厥陰脈循喉。陽氣刻刻擾動無主。多屬陰虧。脈形細動。不受

溫補。肺藥久進。必傷胃口。

熟地炭 女貞子 湘蓮肉 茯苓 芡實 川石斛 炒山藥



肺家留熱。頻年嗆發。據說痘後有此。長夏諸陽升騰。而霉天反燥。當清肺之急。迫潤肺之燥烈。

清阿膠 枯黃芩 南花粉 地骨皮

山塘七十五。立冬未冷。溫熱之氣外入。引動宿飲。始而狀如傷風。稀痰數日。繼則痰濃咽乾。是少陰脈中之津上承。五液盡化痰涎。皆因下虛易受冷熱。是以飲邪上泛。老年咳嗽。大要宜調脾腎。最忌發散泄肺理嗽。暫用越婢法。

麻黃 石膏 甘草 芍藥 生薑 大棗

朱客肋稍隱痛。卧起效甚。冷汗。背有微寒。兩足帶冷。身體仰卧稍安。左右不堪轉側。此皆脈絡中病。良由客寒閉其流行。兩脈逆亂上犯故也。治在血分。通絡補虛。

枸杞子炒 酸蓉乾 當歸小苗同炒黑 桃仁炒 炙山甲

咳嗽從肺治者。以外邪必由皮毛而入。內合乎肺。然六氣皆令火化。散之未解。清之潤之即愈。若因內之嗽。由別經干連及肺。當明其因。徒治肺無益。夫腎為先天坎中真陽內藏。而主封蟄。奇經得司其間。衝陽由前直起。且少陰脈循喉嚨。挾舌本。陰之上承。陽獨自灼。故陰上陽下則壽。反則死。八味丸陰中之陽。似乎有理。然肉消形瘦。桂附仍屬剛燥。宜溫和柔劑。取血肉有情之品。議用斑龍峻補。玉堂開下。但鹿角入督升頂。有過升之弊。加以青鹽。引入下元。斯為合法。



鹿角霜 熟地 菟餅 白茯苓 青鹽 補骨脂 柏子仁  
運漕四十四 冬藏失司。咳吐涎沫。是腎病也。醫見嗽。咸以肺藥治嗽。宜其年餘無效。

桂苓甘味湯

黃家卷二十七 色奪脈促。寒露霜降。嗽甚。風冷。形肌凜凜。衛陽疏。氣易泄也。

小建中湯

馬元儀先生治一客。久嗽。紫云。欬嗽經久。語聲低怯。面色黧黑。痰氣腥穢。診其脈浮。虛且濇。此陰氣內傷。風邪外襲。邪正相搏。氣湊於肺故也。蓋言語低怯者。肺為金象。金空則鳴。邪氣入之。則金反實也。面色黧黑者。肺合皮毛。其榮在外。邪客其中。則血不華也。脈浮為虛。風脈濇為陰傷。表邪與內燥相合。即係風燥。二邪為病。不當但僅從表散一法。以風劑多燥。轉能耗液為害。愈逆也。然使以苦寒之劑。治火而遺風。則不但壅遏外風為逆。且苦從寒化而亦傷血。以氣結津枯之體。尚堪重奪其血。而益其火乎。治法先宜肅清肺氣。氣清而火降。火降而風熄矣。

紫苑 葛根 枳殼 桔梗 杏仁 蘇子 前胡 薄荷

後方用

製首烏 蘇子 貝母 杏仁 桔梗 甘草 花粉 瓜蒌仁 蔗漿 蘆根  
又治一客。兩寸浮大。關尺虛小。咳嗽夢遺。面色枯白。不任風寒。此衛外之真陽不固。



腎中之真陰又弱。當擬玉屏風散。以益其氣而充腠理。早進七味丸。以養腎氣而主蟄藏。兼服大造歸脾丸。以補心脾而充血氣。

又治一咳嗽。食減寒熱自汗。脈空大急疾。此中氣大虧。虛陽不為外固也。陽既不固。陰氣不能獨存。先當固衛外之陽。次補內守之陽。則真氣內振而虛風可熄。

玉屏風散加貝母 杏仁 蘇子 人參 桔梗

一客患咳嗽多痰。氣逆作喘。不得安枕。自汗少食。求治於馬元儀。馬診云。其脈虛微無神。此勞倦致傷脾肺。蓋脾為元氣之本。賴穀氣以生。肺為氣化之原。而寄養於脾者也。有所勞倦。穀氣不盛。則形氣不充。經所云勞則氣耗。氣與陰火勢不兩立。氣衰則火自勝。土虛則不能生金。陰火又從而剋之。故喘咳自汗。法當實肺補脾。方用

人參 炙芪 炙草 川貝 紫苑 蘇子 杏仁 桔梗 防風  
兼進七味丸。以培土母。

一客咳嗽半載。喘急不卧。舌燥無津。馬元儀診之。脈右關尺虛濇無神。此肺腎兩虛也。肺為出氣之路。腎為納氣之府。今腎氣虧乏。吸不歸根。三焦之氣出多入少。所以氣聚於上而為喘嗽。口乾不得安卧。法當清氣於上。納氣於下。使肺得其清寧。脾得其蟄藏。則氣自納而喘自平矣。方用

蘇子降氣湯加 人參 肉桂 繼用金匱腎氣丸。

馬紫五則。附錄於上。以資借鏡。

(七) 哮喘

病之原由。食柿過多。得寒而起。於茲二十餘年矣。要知柿為西方之木。其實重穠。其氣而成。其與肺金。為同氣相求。可知其邪入肺。發為氣哮喘。久則腎水無本。虛而喘。泛為痰。胃為貯痰之器。所以降氣湯。六君子。由肺及胃。皆得小效。而不除要管。與即。墨不拔。齊地終非燕有。况脈象尚悍。當深入病所為是。擬仲景方法。

甜葶藶 苦葶藶 大棗

附錄葉香巖先生醫案於左。以資對照。

發熱痰喘。胸中滿。身痛。左邊鞏丸不時逆上。痛不可忍。肝脈弦急。肺脈獨大。此肝肺受邪之故。肝為木藏。其化風。其生火。風火合併。旺於木位。則為熱為痛。乘於肺金。則為痰為喘。法宜滋達肺金。兼疏肝木。

萋仁 紫苑 半麩 川貝 桔梗 枳殼 杏仁 蘇子 柴胡 秦艽

揚州 四十四 痰飲哮喘。遇寒勞怒即發。

小青龍湯。去麻黃。

再附錄馬元儀治喘醫案。以資對照。

發熱喘急。頭痛引脇。面赤不渴。二便如常。左脈弦虛。右脈空大。此無形之感。按有形。





之痰。表裏合邪。互結於胸脇之位也。口不渴者。外邪挾飲上逆。不待引水自救也。二便調者。病在胸脇。猶未擾亂中州也。仲景治法。表不解。心下有水氣。咳而微喘。發熱不渴。小青龍主之。方用麻桂以達表散邪。半夏以滌飲收陰。乾薑細辛以散結而分逐浪。以歸江海。斯在表之邪從汗解。在內之邪從內消。喘嗽氣急。面色枯白。飲食減少。夢洩不禁。兩脈虛微。此真氣上脫。陽氣外散也。面色枯白。脾肺氣衰而不榮也。飲食減少。脾胃氣衰而不化也。夢洩不禁。腎藏氣衰而不固也。

人參 黃芪 肉桂 炙草 茯苓 半夏 橘紅

痰喘發熱。口乾胸滿。身痛惡寒。其脈弦數且濇。此鬱結內傷。風火外熾。邪正相搏。氣湊於肺。肺燥氣逆。痰涎入之。升降不清。胸膈有聲。內經所謂心肺有病。而呼吸為之不利也。清氣既傷。濁氣上升。津液轉為稠痰。經絡壅塞。遂成是病。治宜清氣潤燥。喘自愈矣。

瓜蒌仁 半夏 枳殼 秦艽 杏仁 桂枝 蘇子

脈兩寸浮數。餘俱虛濇。火升痰喘。喉間窒塞。此抑鬱過多。肺金受病。金病則火動。火動則痰生。火痰相搏。氣湊於上。故喘促不寧。而氣道不利。法當舒通肺鬱。肺氣舒則

火降痰消。

紫苑 葛根 枳殼 半麩 橘紅 杏仁 蘇子

(八) 膈

內經稱三陽結乃成膈者。單指太陽陽明少陽也。今從脈色較之。少陰與厥陰亦病。若以填補下焦為首務。固所當然。但胃關一部。從何飛渡。且有一團鬱火。按不邪積。亢於中州。得熱為伍。愈肆猖狂。苦寒勢所不容。甘寒勢不容緩。倘令肺不生津。火腸不生液。津液愈虧。為病愈繁矣。且逆上者。肝邪也。水不生之耳。不納者。胃氣也。肝氣不降耳。且一身之中。津液真精。皆為切要。愚見專事於此。未識如何。先進五汁。次商投藥可也。

蘆根汁 甘蔗汁 茅根汁 鮮藕汁 水梨汁 各一杯 生薑 沉香汁 各一小匙

附錄葉香巖醫案於下。

芮前議肝病入胃。上下格拒。考內經諸痛皆主寒客。但經年累月久痛。寒必化熱。故六氣都從火化。河間特補病機一十九條亦然。思初病在氣。久必入血。以經脈主氣。絡脈主血也。此臟腑經絡氣血須分晰辨明。投劑自可入殼。更詢初病因驚。夫驚則氣逆。初病肝氣之逆。久則諸氣均逆。而三焦皆受。不特胃當其衝矣。謹陳緩急先後進藥方法。厥陰篇云。氣上撞心。飢不能食。欲嘔。口吐涎沫。夫木既犯胃。胃受剋為虛。



仲景謂制木必先安土。恐久剋難復。議用安胃一法。

川連 川棟子 川椒 生白芍 烏梅 淡薑渣 歸鬚 橘紅

內經以攻病剋制曰勝方。補虛益體。須氣味相生曰生方。今胃被肝乘。法當補胃。但胃屬腑陽。凡六腑以通為補。黃連味苦能降。戴元禮云。諸寒藥皆凝滯。惟黃連不凝滯。有薑椒歸鬚氣味之辛。得黃連川棟之苦。做內經苦與辛合。能降能通。芍藥酸寒。能泄上中木乘。又能和陰止痛。當歸血中氣藥。辛溫上升。用鬚力弱。其氣不升。梅占先春。花發最早。得少陽生氣。非酸斂之收藥。得連棟苦寒。內經所謂辛苦泄熱也。以氣與熱俱無形無質。其通逐之法迥異。故辨及之。

又春分前七日。診右脈虛弦帶滯。左脈小弦勁而數。胃痛已緩。但常有畏寒鼓慄。俄頃發熱而解。此肝病先厥後熱也。今歲厥陰司天。春季風木主氣。肝病既久。脾胃必虛。風木鬱於土宮。營衛二氣未能流暢於經脈。為營養護衛。此偏熱偏寒。所由來矣。夫木鬱土位。古人制肝補脾。升陽散鬱。皆理偏救和為主。勿徒攻補寒熱為調。今春半天令漸溫。擬兩和氣血。佐以宣暢少陽太陰。至小滿氣暖泄越。必大培脾胃。後天方合歲氣體質。調理定春季煎丸二方。

人參 茯苓 廣皮 炙草 當歸 白芍 丹皮 桑葉薑棗湯法丸  
同用 煎 麥 人參 廣皮 穀芽 炙草 白芍 黃芩 丹皮 柴胡

高年少腹氣衝。腕下心肋時痛。舌底流涎。得甜味。或靜卧。少瘥。知飢不食。大小便自窒。此皆陰液內枯。陽氣結閉。喻西昌有滋液救焚之議。然衰老關格病。苟延歲月而已。醫藥僅堪圖倖。

大麻仁 柏子仁 枸杞子 肉苁蓉 紫石英 炒牛膝  
通下。下通。腕中仍結。上下格拒者。乃上熱下寒。古人用麻沸湯煮涼藥以解。上濃煎溫補以治下。使陽氣不脫。鬱熱自罷。今倣之。

黃芩 小川連 枳實 上三味入滾水中煮五十沸。即濾。

人參 淡附子 乾薑 上三味煎藥汁一盃。和入前藥服。

關格者。經言脈數俱盛四倍。陰陽結邪。相離而不復相管。羸不及於天地之精氣。則危矣。極言關格之不可治。前賢擬方。亦皆未盡善。愚意離愁鬱結。病屬七情。果難措手。今此症由甘肥積熱。酒性燥悍。致傷臟腑津液。治以清通清滋。或尚可希冀。

川連 生草 枯萋皮 元參 枳殼 膽星 苦丁茶 柏子仁

元明粉等分。蜜丸。

按膈症與關格。乃絕然兩症。膈係三陽結。關格係陰陽相離。症情各別。而庸手每不知辨別。故特附錄葉氏關格案。使讀者得以自分涇渭。知膈自膈。關格自

關格。不復顛預施治也。



(九) 瘕

治產後少腹結瘕

人參 雲母粉 當歸 金鈴子 生地 吳茱萸 炒白芍 乾漆

炒白川芎 製香附 藕粉 生用 老白薤根

右為末。真神麩糊丸。菘豆大。每日百丸。空心開水送下。

附錄葉香巖醫案。以資參考。

脈沉而微。沉為裏寒。微為無陽。舌白似粉。瀉起口渴。身體臥著。其痛甚厲。交夏陰氣在內。其病日加。寅辰少陽升動。少緩。少腹至陰部位。濁陰凝聚。是為疝瘕。若讀書明理之醫。凡陰邪盤踞。必以陽藥通之。歸地列於四物湯。護持血液。雖佐熱劑。反與陰邪樹幟。當以純剛劑。直走濁陰凝結之處。調攝。非片言可盡也。

川附子 黑川烏 吳茱萸 乾薑 猪胆汁

再診。陰寒盤踞少腹。非純陽剛劑。直入堅冰之地。陰凝不解。此如亞夫之師。從天而降也。醫易腎氣湯。陰多陽少。立見病加。反至不食。藥不對症。仿通脈四逆湯法。

附子 乾薑 猪膽汁

經月瘧邪。仲景謂結為癥瘕者。氣血交病。病已入絡。久必成滿脹瘧母。膠固粘着。又非峻攻可拔。當遵鼈甲煎丸之例。日餌不費。以搜絡邪。





鼈甲煎丸三百粒

每服十粒

日服二 夜服一

(十) 積

少腹有形。隆起如阜。上至心下。則厥逆。來疾去駛。雖大力人不能拒之。卻止則人身為之上竄。下則人身為之下墜。不能強掙。一翕一闕。一上一下。迺至人身如春杵。口鼻兩陰之血。隨其上下。溢出。羣醫不能治。余思此症載入難經。特未曾縷晰示人耳。且云此物伏在臍旁上下。則少楚。伏入臍中。則少安。可見臍旁兩穴。有與此條相合。且弗揭明其義。一任羣公思而得之可也。

用薄荷湯送下神祕丸。以病人自思此湯飲之。其物之伏而不動。故亦用之。

按難經。積者五藏所生。其始發有常處。其痛不離其部。上下有所終始。左右有所窮處。

腎之積名曰贲豚。發於少腹。上至心下。若豚狀。或上或下。無時。久不已。令人喘逆。骨痠少氣。以夏丙丁日得之。何以言之。脾病傳腎。腎當傳心。心以夏適王。王者不受邪。腎復欲還脾。脾不肯受。故留結為積。故知贲豚以夏丙丁日得之。

附錄葉紫於下。

病因食物不節。其受病在脾胃。既成形象。在左脇之旁。是五積六聚。喜暖惡寒。陽氣久傷。溫劑必佐宣通。食物宜慎。

草果 華撥 雞內金 砂仁殼 厚朴 廣皮 阿魏搗丸  
瘡發六七十候。寒熱邪聚。必交會於中宮。脾胃陽氣消乏。致痞脹不能納食。運化三年不愈。正氣未復。診脈沉微。陽傷必濁陰盤踞。但以洩氣寬脹。中州愈困愈劇。必溫通濁走陽回。是久病治法。

生淡乾薑 生益智 厚樸 茯苓 人參 泡淡附子

(十一) 虛損

骨小肉脆。定非松柏之姿。脈數經停。已現虛勞之候。先天既弱而水虧。壯火復熾而金燥。歲氣一週。一損豈容再損。秋風乍薦。已傷難免重傷。証具如前。藥惟補北。非敢說夢。聊以解嘲。

生地 沙參 地骨皮 麥冬 金石斛 生鱉甲

癯勞得愈。如麟毛兕角。或叩之瓊台丹扃間。求金光一葉。庶幾脫然。

小建中湯

脈象右三部。洪數弦急並現。左上數中緊。先患陽精不升。次及陽絡不固。蓋至陰生陽。不屯失精。為先天至陽出陰。失蒙吐紅。為後天是有形始兆之後。復現先後天俱病。即稟至真之餘之軀。亦不足以供其漸耗。令將投味厚入陰者乎。抑味薄清陽者耶。竊恐山川草木。皆不足以還返金品。莫妙夫大藥金丹。週天火候耳。然又不可不



以服食之方佐之。擬候尊師同訂。終慙布鼓。相諒之。

建蓮肉 一斤帶心。撲如麻子大飯。未蒸晒至九次研為細末。

麥冬肉 一斤

嫩荷葉 半斤

頂生地 四兩

金櫻子 半斤

以前四味熬膏。同蓮肉粉杵為丸。秋石湯送五錢。

此症原屬胃之冲和之氣而起。要之冲和之氣。即太和元氣。位天地育萬物。無非此氣。少有不足。已非所宜。况大有所損乎。拙見宜謝絕一切高養山齋。餌以藥石。廓然世外。庶幾霍然。若在操觚蓮幕。非所宜也。吾聞君子贈人以言。愛人以德。故瑣屑及此。旋覆花 木瓜 生穀芽 炙草 代赭石 白芍 糯米汁  
人生五十一藏衰。况向六乎。所患聚訟者。皆主腎藏。蓋以所述大旨。在扼定脾臟。則樞機得而四運成矣。

獨木膏。先用十斤可也。

診得脈象。惟有虛細無力。弦象俱退。手足顫動。此元氣虧弱之症。前此投藥。俱無少效者。蓋為元氣不克載藥行令耳。今元氣一日不復。病機一日不退。病機與元氣本不并峙。此長彼消。理之常也。據愚見。湯藥在乎其次。必以直走先天之品。劑為膏丸。朝斯夕斯。久久自足。元氣元精。一朝而復。後天飲食。不強自強矣。因此症非暴感內傷。不必數數更方。以苦陽明胃口。且經不云乎。適於胃者為補。煎藥久服。適於胃者否耶。愚自吳中。承給諫公之命。來斯一診。色脈固知不出此理。勉為鎮台留三日者。



一則感鎮台下士之隆。一則為給諫公篤親之愛。而欲浙中諸醫。一批卻導竅。以報鎮台。今參脈症。母事更張。直補先天可也。議呈煎膏丸三方。煎則暫用。膏則時時頻服。丸則清晨為定。候填補二十日外。便有消息。尚當叩階復診。何如。方未見。真氣已漓。病何能愈。有愈之方者。其仙乎。

歸芍六君去甘草鮮桑枝煎湯代水

骨小肉脆。本非松柏之質。補瀉溫涼雜投。豈是濟生之術。幸能食使實。秋令尚可扶持。然破腮脫肉。側眠經阻。醫者猶然夢夢。何耶。僕老不談醫。聊書數語。并擬一方。

熟地 炙草 當歸 生左牡蠣

此病起於費心勞碌。風寒不節。遂致咳嗽吐痰。久則內傷。內傷者。內中之藏氣傷也。即古人所謂虛勞症。總不得愈。必須絕去費心勞碌之事。一毫凡念不起。助之以藥。或可延年。

麥冬 阿膠 桔梗 炙草 沙參 米仁 茯苓

此症勞也。由於太陰傷損。日傳至足少陰。脾氣少澹。則入下藏也。百無一治。速宜返棹。閉關靜養。方一首奉贈。日飲可也。

熟地 阿膠 百合 枸杞子

花甲之人。兩尺獨大。二藏已衰之際。豈宜如此急進。乙癸同源之法可也。



熟地 女貞子 兔絲餅 茯苓 元參 旱蓮草 枸杞子 蜜丸  
此真陰虧証俗名百日勞也。稍有伏暑。所以寒熱愈甚。惜乎治之不早耳。

熟地 茵草 青蒿 元參 滑石 丹皮

坎中一畫。真陽孤飛於上。一交巳午之月。神水金丹。亦奈之何。

老生薑 天冬 懷牛膝 川石斛 甘草 元參 女貞子

肺為水主。熱淫則融。融則水源竭矣。土為金母。不承則金無生。土金水三藏日漸。無玉液神精。安能返既憊之有形。雖擬禁方。亦據古人之常談耳。

### 葦莖湯

心陰虛則易汗。肺陰虛則多嗽。肝陰虛則火升。腎陰虛則發熱。脾陰虛則便溏。非一真陰乎。怯症之漸也。但知頭痛醫頭之為良醫。不知履霜堅冰至。君子其為憂危之心也。  
炒白芍 小生地 麥冬 棗子 桂枝木 炙甘草 青蒿梗 雲苓  
此一損症也。從上損之下者。一損肺。肺再傳心。傳肝傳脾。脾損便溏。傳之腎。則骨痠。不能於牀。斷不可再投理肺藥。以速其損。惟猪肚丸可服。

### 猪肚丸

未過五旬。形脈色俱衰。叩之連喪三子。得不如是耶。况復傷其孫子。此非藥餌所能療者也。





川貝母 生地 茯苓 麥冬

脈得數而且弦。此陰虧症也。並非外感。今因虛火升而頭痛。漸有金水兩傷之勢。靜攝乃得藥餌其次也。

熟地 女貞子 麥冬 龜板 元參 淡秋石 棗漿為丸 開水送下

嗽而失血。已逾三載。纏綿不已。色黯脈弦。嗽益甚。環口色黃。由肝脾及於腎。上藏為其所取給。而不能應矣。飲亦從而為患。逐之不得。滋之無功。遷延日損。莫可彌縫。當取其中。以奠流布。庶幾及之。擬宗建中法。加以滌飲之品。俟陽明升而繼以大補太陰。然後漸入純陰之法。否則非治也。

小建中湯 薑加茯苓薑皮

古人造字。兩火着力為勞。故為君相二火而說。溫補中州以靜痰之源。補下焦以益水之源。但病勢已深。恐非一擊可破也。

熟地 枸杞子 元參 牛膝 茯苓 紫石英

橫則為三坎。豎則為出水中間一點真陽。水虧則露為龍火。三為震。震下之陽。與之同源。升為雷火。所以雷為木屬。皆陰中之火也。純陰之藥。愈潑愈熾。一切草木。無能制之。當用一元丹。久服愈矣。

淡秋石五六觔。紅棗漿為丸。早服五六錢。晚服二三錢。以陽秋石少許。點湯送下。



病更節候。醫歷多人。朝張言熱。暮李言寒。藏府各有受盛。運氣各有翕闢。眇爾勿躬。遍嘗補藥。不病亦病矣。宜守正持法。幸勿好大喜功。

當歸建中湯

脈弦勁如循刀刃。全無冲和之氣。木氣太過。金令不及。從逆來者謂之賊剋。苟非致太和之氣。以消乖戾。必致陰失潛藏。陽無所倚。履霜堅冰至。豈可不未雨而綢繆乎。老子云。齒剛則折。殆其是也。切囑切囑。此方存之於左券。

炙甘草 北沙參 料豆皮 冬霜葉 生白芍 麥冬肉

左關搏指急疾。右關弦大無謂。氣不歸元。充海無根。右關如是。當劇於春。左關如是。當折於秋。恐左關為應。勉擬古人乙癸同源之治。

大生地 女貞子 枸杞子 茯神 元參 懷山藥 紫石英

諤按虛損一症。調治最難。特將葉香巖虛醫案。附錄於下。讀者與薛案對照互參可也。

肝腎兩虧。虛火爍金。用納氣法。

熟地 牛膝 白芍 青鉛 童便 山藥

脈數小。不飢。痰多。陰虛伏熱。

滑石 麥冬 竹葉 連翹 杏仁 鮮生地



北京中醫藥大學圖書館藏

陰液枯槁。陽氣獨升。心熱驚惕。倏熱汗泄。議用復脈湯。甘以緩熱。充養五液。

人參 阿膠 炙草 麥冬 牡蠣 麻仁 細生地

脈大不斂。神迷嚙語。陰陽不相交合。為欲脫之象。救陰無速功。急宜鎮固陰陽。奠其

魁息。

生龍骨 生牡蠣 人參 阿膠 茯神 淮小麥

留熱未清。營液已耗。但論清邪。恐神索氣奪。膩滯陰藥。防餘熱癰瘍。議理心之用。亦

清補之意。

人參 麥冬 竹心 淮小麥

寒熱半年。少時色黃氣短。欬嘔。是內損。營衛迭偏。勞怯重病。

人參 茯苓 黃芪 炙草 煨薑 南棗

汪正中填固包舉。遺精已緩。新正勞煩氣洩。病後神耗精奪。當此升泄氣候。以安神

固攝法。

桑螵蛸 金櫻子粉 茯神 人參 生龍骨 當歸身 金箔 龜版

陳升葵弟勞病。先傷陰氣。繼而陽傷。夏季脾胃不和。膜脹腹鳴晨泄。凡陽虛外寒。陰

虛熱蒸。皆虛不肯復元之象。非草木可為。病人述腹中氣痛小愈。用藥當宗此旨。

人參 穀芽 茯苓 白芍 炙草 新會皮



上假熱。下真寒。肝腎大虛。加減八味丸。

熟地 茯苓 丹皮 山藥 五味 當歸

脈瀆無神。便澹食少。肛有瘡瘍。兩月未愈。已成漏症。延綿。竟有痼疾之虞。近日嗅怒氣擾。中焦隱痛。至於耗氣卻奪。萬難再餌。議進東垣益氣湯。減黃芪。加木瓜。白芍。煨薑。南棗。以制肝木。

幼年久有遺精目疾。不耐勞煩。先後天未曾充旺。秋季瘡邪。再傷真陰。冬月夜熱。嗽痰失血。不飢不食。盜汗傷陽。陽浮不藏。漸干胃口。皆久虛勞怯之象。此恙屏絕酒色。怒煩。須安閒坐卧百日。必胃口漸旺。病可漸除。古稱精生於穀食也。

北沙參 女貞實 茯苓 炒麥冬 米仁 川斛 芡實

虛損泄瀉。用異功理中。乃補脾胃以煦其陽氣方法。無如失血遺精。金水久虧。陰乏上乘。咽痛失音。而瀉仍不已。長夏吸收暑濕之氣。與身中浮越之氣。互為鬱蒸。遂起疳蝕。氣阻則妨納食。是勞損為本。而雜以暑濕。純補決不應病。與輕淡氣薄之劑。先清上焦。後議補益。

蘆根 馬兜鈴 通草 米仁 滑石 西瓜翠衣

虛損。真陰內涸。當戊己君火主令。立夏小滿。陽氣交併於上。喉舌腫腐。是陰不上承。薰蒸膩涎。吐咯不清。皆五液之變。由司氣感及軀質而然。檢古方。以仲景少陰咽痛例。



用猪膚湯。

交四之氣熱勝元虛。乃氣泄之候。營衛本乎脾胃。不耐夜半。舌心腐碎。呼吸短氣。似不接續。中焦喜按。始得暢達。目胞欲垂難舒。四肢微冷失和。從前調理見長。每以溫養足太陰臟。兼進血氣充形。病減七八。今當長夏脾胃主氣。氣泄中虛。最防客氣之侵。是質重之補宜緩。而養胃生津。寧神斂液。仍不可少。俟秋深天氣下降。仍用前法為穩。擬逐日調理方法。

人參 茯神 天冬 棗仁 知母 建蓮肉 炙草 川石斛 熬膏 早上進

丸藥一次

遇天氣鬱勃泛潮。常以鮮佩蘭葉。泡湯一二次。取芳香不燥。不為穢濁所犯。可免夏秋時令之病。

鮮蓮子湯亦好。若汗出口渴。夜半火升舌碎。必用酸甘化陰。以制浮陽上亢。宜着飯蒸熟。

烏梅肉 冰糖 畧煎一沸。微溫和服一次。

飯後飲茶。只宜炒大麥湯。芥片。或香梗茶。其松蘿六安。味苦氣降。中氣虛者不宜用。

瓜菓宜少。桃李宜忌。玉蜀黍堅滑難化。中虛禁用。





香薷飲泄越滲利。頗不相宜。或有人參者。可以涼服。暫用煎藥。當和中清暑。以雨濕已久。中焦易困耳。

人參 木瓜 扁豆 麥冬 茯苓 甘草 佩蘭葉

臨晚進膏滋藥。

人參 熟地 遠志 甘草 綿芪 茯苓 歸身 桂圓肉 五味 枸杞

照常法熬膏。不用蜜收。白水調服。

當夏季反覆變幻。因天地氣機大洩。身氣久虛。無以主治。故見病治病無功而安中納下。每每獲效。入秋常進附子七味丸。頗合。今秋分節。天氣降。地氣收。緣久熱氣傷。虛體未能收肅。是以肢節時寒。頭巔欲冷。無非病久。諸氣交餒。斯外衛之陽少。護液髓暗耗。則血脈不營。而陰乏內守。凡此皆生氣之淺鮮也。急當溫養益氣。填補充形。使秋冬助其收藏。預為來春生發之用。內經有四季調神之訓。今投藥亦當宗此旨。

鹿胎 一具 羊內腎 對生十 黃狗腎 二十 肉蓯蓉 一兩 大熟地 四兩 砂 茯神 一兩

五味 一兩 湖蓮肉 二兩 人乳粉 五錢 相子霜 五錢 紫河車 一具 青鹽 八錢

右用諸膏并搗地黃為丸。早服五錢。人參湯送。

有年勞傷神瘁。膚無膏澤。時欲腹鳴啾痛。營血不得流行之故。開懷安逸。僅可帶病

延年。



人參 當歸 肉桂 白芍 炙草 茯苓 遠志 熟地炭

蔡興五十七 精未生成。強洩最難充旺。至今未有生育。視形瘦。問食少。精薄易洩。形

脈不受剛猛陽藥。議藉血肉有形。溫養血氣。

鹿鞭 羊內腎 淡荻蓉 瑣陽 生兔絲子 枸杞子 舶茴香 牛膝

青鹽

屢進潤血燥。熄虛風藥。諸症向安。入夏四月。苦於便難寒熱。此夏令陽氣天泄。陰液更耗。虛風動灼為秘。古人每以辛甘化風主治。因體瘦不受溫補。複以鹹苦味入陰之意。

鮮生地 胡麻 製首烏 天冬 柏子仁 杞子 茯神 肥知母 川斛膏

男子七旬。下元脂液已少。陽氣升騰。陰少承供。目恙先從左起。肝主左升也。血無內

藏。陽氣蒸迫。為障失明。顯然水虧。無以生木。不足之症。焉用龍膽黃柏瀉火之理。倘

苦寒傷胃。啞瘖莫及。

羯羊肝 穀精草 浙菊花 製首烏 夜明砂 濂珠粉 枸杞子

蕩口四十六 面黃白。削瘦無神。腹大臍突。足冷腫重。自言如著囊沙。曾經用藥攻下。

下必傷陰。而脹滿不減。乃濁陰錮。必陽傷見症。病在不治之條。但用藥究宜溫熱。以

冀通陽泄濁。



生川附 椒目 炒乾薑 炒小茴 車前子

勞怯形肌日瘁。食減自利。腹痛寒熱。由陰虛已及脾胃。無治嗽清滋之理。姑以戊己湯加五味攝陰為議。是難愈之症。

炒白芍 炙甘草 北五味

寒熱因經水不來而甚。此內經謂二陽之病發心脾。女子不月。肌肉日瘦。腹有動氣。即風消息賁矣。內損成勞。非通經逐瘀所能愈也。

柏子仁 歸身 白芍 桂枝 桂圓肉 生黃芪

脈細右濡左數。少年形瘦。肌槁遺泄。是知識太早。致精血難充。臍左動氣。食減易飢。陰傷於下。漸延中宮。沉陰恐妨胃。剛補慮劫陰。男子精傷。補陰參入柔劑。溫藥取坎中寓陽之意。

鹿角霜 龜腹版 白茯苓 枸杞子 柏子仁 炙甘草 沙蒺藜

炒黑遠志

黎里四十四。形色脈象。確是陽虛。酒食聚濕。濕注入腸。腸痔下血。濕為陰濁。先傷脾陽。陽微氣衰。麻木起於夜半。氣血交代之時。中年疝中。大有可虞。

人參 生於朮 炮薑 炒黑附子 炙甘草

嘉興十八。陰火必從晡暮而升。寐中呻吟。是浮陽不易歸窟。形瘦食少。盜汗。攝回其



下為是

六味加阿膠。人中白

嘉興十八。腎肝內損。必致奇經失職。俗醫混稱陰虛。僅以錢仲陽小兒所用六味。補陰和陽。益藏泄府。要知此時仲陽非為虛損設立。

人參 紫河車 坎炁 人乳粉 秋石 茯苓 五味子 紫衣胡桃

婁門六十七。左右為陰陽之道路。向衰年歲。操持經營。且不獲利。心境失暢。氣血不

和久則拘束為痛。甚於夜者。陽氣衰為入夜。陰用事而病加也。十二味營養法。

人參 白朮 茯苓 炙草 當歸 白芍 地黃 黃芪 陳皮 桂心

遠志

崑山六十二。老年形寒。足痿。噎痰。男子下元。肝腎先衰。真陰少承。五液變痰。倘情懷

暴怒。內風突來。有痲中之憂。戒酒節勞。務自怡悅。壯其下以清其上。是根本治法。

熟地 萸肉 淡菝蓉 川石斛 青鹽 枸杞 淮牛膝 鹿角膠

陽明之脈。主束筋骨而利機關。今行走皆艱。納穀甚少。腹中氣攻。頭痛。自悲憂。五年

日加衰憊。如靈樞經論痿云。意傷憂悲。愁則肢廢也。

枸杞 當歸 防風根 黃芪 沙蒺藜 元參 牡蠣 羚羊角

虛損。心熱。齟乾。咳嗽。失血。此天氣令降。身中龍相反升。下焦真氣不得收納。故也。惟



寧神靜坐。斯天君不動。自得陰上承。陽下降。地天交而成泰矣。

紫胡桃肉 坎炁 糯稻根鬚 北五味子 白蜜

徽州三十五 仲景云。厥陰病。氣上撞心。明示木中風火上行。多氣少血。陰虛之象。治

以痼症痰火有餘大謬。

女貞子 天冬肉 茯苓 小生地 山萸肉 建蓮肉 赤金箔

吳江二十七 肌肉日削。竟夜內熱。是內損陰虛。漸延勞怯。安逸可久。天暖氣洩。病必

漸加。

早服牛乳一杯。另服補陰丸。

湖州二十四 少壯病不復元。失於保養。延為勞嗽。胃氣尚好。可與填精固下。

都氣丸。去丹澤。加胡桃肉。二仙膠。

東山三十二 精損於下。陰中龍雷燃爍。莫制。失血後。肛瘍膿漏。即陰火下墜所致。行

走喘促。涎沫上湧。是腎不攝納真炁。五液變沫湧逆。無治痰治嗽之理。扶胃口。攝腎

真。乃為對病之藥。

人參 茯苓 坎炁 五味子 紫石英 芡實 胡蓮 山藥

泰興二十八 色脈是陰虛。其喉妨食納。乃陰乏上承。熱氣從左上升。內應肝腎陰火。

前議復脈法。大便滑泄。知胃氣久為藥傷。不受滋陰。必當安閑靜室。以調之。豈偏寒





偏熱藥能愈。

人參 茯苓 扁豆 木瓜 石斛 北沙參

錢塘五十四閱原案開列。皆肺腎病。男子中年以後。下元精血先虧。有形既去。自難充復。五液耗奪。內風陽氣易越。治宜從陰引陽。勿以桂附之剛復。

鹿茸 鹿角霜 天冬 天麻 茯苓 淡菝蓉 枸杞子 黃菊花

常山四十三食入。腕悶噯氣。嘔吐覺爽。少馬仍然痞悶。視形氣充偉。按脈形濡。中年陽微不運。即為不足。洩降氣分攻痰。是為有餘治法。非脈症所宜。治中法。

(十二) 失音

短氣失音。喉中時作水雞聲。右脈如草。面浮色痿。肺胃應之。心下痞硬。補瀉紛更。動無一效。甚於水令。劇於春候。擬進葶藶越婢成湯。進飲三劑。

石膏 桂枝木 白芍 杏仁 冬瓜子 生米仁

脈弦數。尺獨大。效而喉痛失音。乃數載失紅之後。其陰虧火炎。不言可喻矣。唯有至靜之品。引陽潛入陰中。庶近內經之旨。然須作靜攝工夫。使陰秘陽密。得坎離相交

之力為妙。

熟地 海石粉 揚爛 金石斛 北沙參 茯苓 麥門冬 生白芍 龜腹版 山藥

附錄葉香巖醫案於下。以資對照。



瘖啞而痿者。內經謂之瘖痺。此陽盛已衰。入於陰也。由勞傷其腎。耗奪真陰。當以內養為主。非草木之藥所能挽回也。

河車大造丸

音啞者。陽邪搏於三陰。少陰之脈循喉嚨。太陰之脈連舌本。厥陰之脈出咽喉故也。然陽邪搏陰之候。正未易治。

甘草 桔梗 萋皮 麥冬 川連 杏仁 丹皮 生蒲黃 生地

久嗽失音。脈小。痰冷。衝氣入暮為重。此肺虛氣餒。不易驟愈。酒家有飲邪。

桂苓甘味湯

長善。沃毆。詈大聲。用力。氣逆失音。雖陰虛腦洩。亦必用輕陽肅上。

桑葉 枇杷葉 生甘草 象貝 米仁 沙參

舟里 五十 肺痿。聲啞。胃減。食入不安。難治之虛損。

戊己湯

(十三) 脾胃

飲食不知者。太陰虧也。葛稚川肘後方。有一味治虛勞之法。少陰厥陰虧者。鹿角散。太陰虧者。神曲散。今用神曲散。

真陳六神曲。研細炒香。四兩。每食後。用開水調服二錢。



中焦為氣血津液朝會之所。診得胃氣不能脈中流布。其亦元氣中餒也。酸以攝洩。辛以流動。惟甘以培養。因增腫患而卻之擬方備閱。

橘白 灼艾 醒頭草 麥冬 木瓜 五味子

附錄葉香巖案以資對照

頻頻勞怒。肝氣攻觸胃脘。胃陽日衰。納食欲吐。胃不主降。腸枯不便。仿仲景食穀則噦。用吳茱萸湯。

人參 黃連 茯苓 乾薑 吳茱萸

陽微。嘔吐不飢。

人參 半夏 茯苓 白芍 淡附子

胃中不和。痛瀉。

茅朮 厚樸 廣皮 木香 炮薑 茯苓 猪苓 澤瀉 砂仁

胃弱。肝氣不和。口中吞酸作苦。食物無味。擬進加味溫胆湯法。

溫肝湯加入參川斛

脾胃不和。腹膨痛。夜自汗。先疏利氣滯。保和丸。焦鍋巴。陳茶。薑湯下。

脈微而遲。色衰萎黃。凡陽氣不足。久利久瀉。窮必傷胃。今浮腫漸起。目下是水失火而敗。若非暖下。徒見泄瀉。有紅為脾胃濕熱。必至中滿敗壞。



熟地炭 淡附子 茯苓 車前子

脈左弦。右浮濇。始由腕痛貫脇。繼則腹大高凸。納食減少。二便艱濇不爽。此乃有年操持。紫慮太甚。肝木沸鬱。脾土自困。清濁混淆。脹勢乃成。蓋藏真日漓。府陽不運。考古治脹名家。以通陽為務。若制陰柔藥。微加桂附。凝陰返濁。豈是良法。議用局方萬餘糧丸。煖其水藏。攻其穢濁。俟其小效。兼進通陽剛補。是為虛症內傷。脹滿治法。至於攻瀉刮奪。都為有形而設。與氣陽之病不同也。

萬餘糧丸

脈緩弱。腕中痛脹。嘔湧清涎。是脾胃陽微。得之積勞。午後病甚。陽不用事也。大凡脾陽宜通則運。溫補極是。而守中及膩滯。皆非通府。勿佐用之。

人參 半夏 淡乾薑 生益智 茯苓 生薑汁 大便不通間服半硫丸五分

飲入。腕膈鳴響。唇乾嗽。不喜飲。臍腹微痛。晝欲寐。夜不寐。是脾胃未和。陽氣不得下交於陰。宣通氣分。宗仲景腹痛。必加芍藥以和陰。

人參 白芍 穀芽 半夏麩 黑芝麻 霜桑葉 茯苓 陳皮

今年浮腫腹脹泄瀉。皆雨濕太過。脾陽鬱遏。久則氣窒。小溲不利。凡分消健中。調治其氣。水濕自去。脾陽漸復。酒肉閉氣食物宜忌。

生白朮 茯苓皮 生益智 椒目 厚樸 廣皮 澤瀉 豬苓



上燥治氣。下燥治血。此為定論。今陽明胃汁之虛。因久痛嘔逆。投以香燥。破氣津液。刮傷胃氣。不主下行。腸中傳送開閤。皆失其職。司經云。六腑以通為補。豈徒理燥而已。仍議清補胃陰為法。

鮮生地 甜梨肉 天冬肉 人參 生白蜜

宜興十九瘧痢後。脾胃兩傷。用繆氏法。

雙補丸方

肢冷湧涎。臍上痛墜泄瀉。而脈緩。此為脾厥。以辛香醒中。兼解少陽之鬱。

生益智 香附汁 厚樸 柴胡 煨木香 陳皮

痰濁久留脾胃絡中。黑糞自下。肌色變黃。納食漸減。腕中時痛。不易運化。中宮陽氣日傷。新血復為瘀阻。夫脾藏主統血而喜溫暖。逐瘀鮮效。讀仲聖太陰九條。僅僅溫下一法。但溫後必以溫補醒陽。否則防變中滿。

尋桂心 煨木香 生桃仁 製大黃

秋深曾診。擬議此病為裏濕。更傷瓜果。辛甘寒分利。脾陽又受辛寒之累。致濁氣聚形。頻遭食復。陽屢被戕。凡身中脾陽宜動。動則運。腎陰宜藏。藏則固。斯為病根。局方大健脾丸。仲淳資生丸。多以補虛通滯。芳香合用者。取其氣通濁洩。人參補正之力得矣。





人參 茯苓 益智仁 根木香 厚朴 新會皮  
咳嗽瀉痢。藥治相背。治肺礙脾。治脾礙肺。方今交冬。治痢為要。病人說早食相安。晚  
食脹滿。脾胃陽氣已乏。勿徒消滯寒剋矣。

白芍 桂酒 益智 廣皮 茯苓 焦白朮 炙草 穀芽 砂仁 殼

左脈弦大空虛。右脈虛軟滯。能食不能運。便溏跗腫。此係積勞傷陽。壯歲經年不  
復。當作虛症。宜補脾腎治。

人參 於朮 茯苓 煨益智 淡附子 白芍 甘草 乾薑 胡蘆巴

勞傷胃痛

熟桃仁 延胡索 柏子仁 當歸尾 炒丹皮 漏蘆

茹素胃弱。向係肝陽熱熾。今微眩耳鳴心怔。議甘以養胃。緩熱。少佐酸味。

酸棗仁 柏子仁 炙甘草 鮮白藕汁 大生地 甜細真 北沙參

大麥冬 雲茯苓 萸肉炭

(十四) 遺精

素來擾虧根本。不特病者自嫌。即操醫師之術者。亦跋前疐後之時也。值風木適旺  
之候。病目且黃。已而遺精淋濁。少間。則又膝脛腫痛不能行。及來診時。脈象左弦數。  
右搏而長。面沉紫。而時時作嘔。靜思其故。從前紛紛之病。同一邪也。均為三病。次第



纏綿耳。由上而下。由下而至極下。因根本久撥之體。復蒸而上。為胃病。是腎胃相關之故也。倘不稍為戡除一二。但取回陽返本。竊恐劍關苦拒。而陰平非復漢有也。謹擬一法。畧効丹溪。未識如何。

羚羊角 木瓜 酒炒黃柏 伏龍肝 生米仁 橘紅 馬料豆

附錄葉香巖案。以資對照。

有夢遺精。治在心腎。乃二氣不交所致。冬令牙宣。亦主藏納淺鮮。用鎮固寧神方。

熟地 棗仁 茯神 金箔 人中白 女貞子 湘蓮子 早蓮草 遠志

龍骨 蜜丸。

時刻精遺。少腹脹滿。皆腎不收納。咽喉微乾。火升及面。由陰不上承。虛陽浮越。上年用純陰靜藥。即瀉下損及中。今當固下。

熟地 山藥 茯苓 北五味 人參 芡實 湘蓮 人乳粉 同河車 金櫻子

膏為丸。

遺由精竅。淋由溺竅。異出同門。最宜分別。久遺不愈。是精關不攝為虛。但點滴痛癢。少腹堅滿。此屬淋閉。乃氣墜不通。未可便認為虛。况夏秋足指先腐。下焦蘊有濕熱。氣不流行。膀胱撐滿。遂致堅滿耳。五苓散主治。

五苓散



初以心動精洩。久則關鍵滑溜。食減至半。業已損及中焦。莫地滋膩滯胃。下焦之陰未得其益。中宮之陽先受其累。至於黃柏味苦。苦更傷陰。當以妙香散加金箔治之。為穩。

人參 龍骨 遠志 茯神 金箔 益智 茯苓 硃砂 甘草

下利皆令傷陰。值冲年情念正萌。遂患夢遺。勞煩饑餒更甚。以精血有形。必從水穀入胃。資其生長也。診脈數面亮。莖舉則精出。溺後則淋瀝。是陰虛精竅不固。因陽氣下墜所致。議固下陰以和陽。

熟地 旱蓮草 生龍骨 懷山藥 杜芡實 萸肉 雲茯苓 蓮蕊鬚

金櫻子膏 煉蜜為丸

精腐。瘀血阻閉。溺竅為痛。似淋非淋。久則陽維脈傷。寒熱起。五液枯耗為便難。乃虛症也。

鹿茸 淡菝蓉 柏子仁 枸杞子 沙蒺藜 茯神 當歸

接服 鹽水炒骨脂 淡菝蓉 沙蒺藜 枸杞子 厚杜仲 茯神 鹿茸

龜版

丸方。河車膠 沙蒺藜 龜版 水煮熟地 枸杞 麋茸 茯神 菝蓉

(十五) 瘧



仲景書云。瘧脈自弦。一句開盡人天眼目。今三部九候之中。並無一毫弦象。可見與正氣相戰者。非比風之春。夏之暑。南方之瘴也。於此推之。思過半矣。

草果仁 炒厚樸 陳皮 白茯苓 製蒼朮 炙草

脈愈按愈大。可知陰氣不足。瘧邪得以深入。漏蘆鱉甲。滋陰太過。非花甲勞心之體所宜。汗洩過多。陽氣亦虛。胃間伏邪。水飲不入。種種皆所不勝也。豈宜再從汗解耶。病者小心。醫者慎之。

人參 菟仁 淡黃芩 生牡蠣 生地 陳皮 小青皮 生首烏 新藪

薑汁

附錄葉香巖醫案。以資對照。

正氣以虛。熱邪陷伏。故間瘧延為三日。其象為厥。舌潤胸痺噦嘔。恐成翻胃。呃逆之症。先以旋覆代赭鎮其上。逆之氣。以瀉心散其胸中之熱。

人參 川連 白芍 旋覆 代赭 牡蠣

瘧得汗不解。近來竟夜汗出。且胸痞不飢。形瘦脈大。便秘。顯然陰虛體質。瘧邪燥液。致清陽痞結。腕中議以柔劑。存陰卻邪。

竹卷心 辰砂 益元散 生地 麥冬 知母

脾經瘧邪。必由四末擾中。仲景論太陰經九條。深戒攻下。謂脾為孤藏。體陰而用陽。



喜暖而惡寒。不飢痞脹。噯氣陽傷。則運動無權。滯濁瀰漫矣。昔賢製方。陽傷取藥之氣。陰傷取藥之味。奈何不究病之陰陽。不分藥之氣味。便窒則攻下。痞悶則開洩。藥不對病。脾胃受傷。數年沉痾。如脾胃論。莫詳於東垣。

炒半夏 淡吳萸 生益智 華撥 乾薑 茯苓

苦辛過服。大瀉心陽。心虛熱收於裏。三瘧之來。心神迷惑。久延恐成痼症。考諸金匱。仲景每以蜀漆散為牡瘧治法。

雲母石 蜀漆 生龍骨 為末。開水調服二錢。

下焦精虧。瘧邪遂入少陰。當其發作。從背起。乃太陽與少陰。表裏相應也。陰邪得汗不解。托邪固是。但氣易泄。薑附純剛。又恐劫陰矣。

人參 鹿茸 桂枝 細辛 杞子炭 歸身炭 生薑

向來久效傷肺。更值雨潮。感邪但熱不寒。是為瘧瘧。仲聖云。消燂肌肉。當以飲食消息之。在乎救胃以涵肺。醫知是理否。

竹葉 麥冬 連翹 甘草 桑皮 青蔗汁

瘧起四肢。擾及中宮。脾胃獨受邪攻。清氣已傷。不飢不食。胃中不和。夜寤不寐。小洩赤濁。即經言中氣不足。洩溺為變。須瘧止之期。干支一周。經腑乃和。明理用藥。疎痰氣補脾胃。清氣轉旋。望其納穀。





熟半夏 生益智 人參 厚樸 茯苓 廣皮 臨服入薑汁三分。

陽虛。陰亦傷損。瘧轉間日。虛邪漸入陰分。最多延入三日。陰瘧。從前頻厥。尚治厥陰。

肝藏而效。自遺洩至今。陰不自復。鄙見早服金匱腎氣丸四五錢。淡鹽湯送。午前進。

鎮陽提邪方法。兩路收拾陰陽。仍有洩邪功能。使托邪養正。兩無妨礙。

人參 生龍骨 生牡蠣 炒黑蜀漆 川桂枝 淡熟附子 炙草 兩棗

生薑

此仲景救逆湯法也。龍屬陽入肝。蠣屬陰入腎。收瀉重鎮。臟真自固。然二者頑。

鈍呆滯。藉桂子以入表。附子以入裏。蜀漆飛入經絡。引其固瀉之性。趨走護陽。

使人參甘草以補中陽。薑棗以和營衛也。

暑邪成瘧。熱結三焦。脫痞有形。煩渴喜冷飲。從河間法主治。

瘧發三日。三月不止。邪留在陰。熱解無汗。氣衝胸悶。痰涎甚多。問寒起腰髀及背部。

議從督脈升陽。

人參 炒黑川椒 鹿茸 茯苓 炒黑小茴 炒當歸

鳳陽 三十八 瘧後脾弱。肝乃乘之。中氣不舒。所以易生嗔怒。

焦白朮 生益智 茯苓 廣皮 枳實皮 檀香末 水泛為丸。

瘧病。內經謂小邪之中。雖云十二經之瘧。總不離乎少陽。少陽肝胆相附。瘧久盤踞。



未免凝痰積血。即成病根矣。虛者補正為先。補正不應。法當破血。

柴胡 草果 炒桃仁 青蒿 半夏 歸尾 桂枝 炒黑蜀漆

高年正氣已衰。熱邪陷伏。故間瘧延為三日。此屬厥象。舌涸脘痺。噫氣。嘔胃。虛客逆。恐有嘔吐呃忒之變。議用旋覆代赭。鎮其逆亂之氣。合瀉心法。以開熱邪。壅結為主。

人參 川連 乾薑 白芍 旋覆花 代赭石 烏梅 牡蠣 半夏

服一劑。減去半夏乾薑服。

經云。夏傷於暑。秋為咳瘧。今時已孟冬。瘧始發動。蓋以邪氣內藏於臟。為厥少兩陰。經瘧也。擬以溫臍法。

厚樸 製附子 生牡蠣 炙甘草 大棗

寒熱而嘔。罷則汗出。四日一發。此牝瘧也。瘧論云。邪氣客於六腑。而有時與衛氣相失。不能相得。故休四五日。或數日乃作也。今脈沉弦遲。發必大吐大汗。陽氣與中氣乏竭。應扶陽補中。以固元氣。

製川附 人參 炮薑 炒白芍 炒果仁 牡蠣 炙甘草 加大棗一枚

淮安二十二 露薑飲止瘧。是益中氣以祛邪。虛人治法皆然。脾胃未醒。宜忌腥酒濁

味。



大半夏。加益智。橘紅。薑汁泛丸。

邪深入陰。三日乃發。間瘧至。必腰腹中痛。氣升即嘔。所伏之邪。必在肝絡。動則犯胃。故嘔逆煩渴。肝乃木火內寄之藏。胃屬陽土宜涼。久聚則變熱。與初起溫散不同。邪久不祛。必結瘕形瘧母。

生鼈甲 生桃仁 知母 滑石 醋炒半夏 草果仁

瘧母竊踞少陽。氣血凝阻。

蜈螂 金鈴子 桃仁 三稜 廔蟲 歸身 元胡索 蓬朮 薑汁丸

(十六) 濕

本屬濕溫。犯在三焦。充斥腠理。誤傷手太陰足太陽之氣。必致漸入虛損。一途非病之過。治之過也。必移入高明靜虛之室。治以百日之遙。庶幾得之擬方。開太陽。益太陰。

淡乾薑 同五味子搗爛 茯苓 地骨皮 桑葉 生扁豆 生甘草

此太陰被濕氣薰蒸。無清肅之權。木無畏。右肩臂漸顯不仁之象。麴蘖傷生而尚甘之。我不解也。

生米仁 鮮蘆根 生地 嫩桑枝 白歸身 赤芍

附錄葉香巖治濕醫案。以資對照。



述胸腕脹痞。不饑不食。大便溏滑。已有五年矣。夫胸中乃清氣轉旋。清陽失運。濁氣凝聚為患。水穀氣蒸之濕。濕盛遂成五洩。陽氣日微。宣脾陽。可使氣機之運。氣行濕自去耳。

生白朮 益智仁 真茅朮 厚樸 茯苓 華撥 廣木香 新會皮

范升九四肢乍冷。自利未已。目黃稍退。而神倦不語。濕邪內伏。足太陽之氣不運。經言脾竅在舌。邪滯竅必少靈。以致語言欲蹇。法當分利。佐辛香以默運坤陽。是太陰裏症之法。

生於朮 草果仁 厚樸 木瓜 茯苓 澤瀉

第二案身體稍稍轉動。語蹇神呆。猶氣機未為靈轉。色脈非為有餘。而濕為陰邪。不徒偏寒偏熱已也。

生於朮 石菖蒲汁 鬱金 茯苓 遠志 米仁

第三案濕滯於中。氣蒸於下。失降。不得寐。口起白疳。仍不渴飲。開上鬱。佐中運。利腸間。亦是宣通三焦也。

生於朮 寒水石 米仁 桔梗 廣皮 猪苓 澤瀉

第四案濕勝。中宮不運。易生痰飲。不欲食。須使神機靈泛。少佐疏滯。

外臺茯苓飲。去廣皮。加 天竹黃 石菖蒲。



第五案 人參 金斛 枳實 於朮 茯苓 廣皮  
第六案 脾胃不醒 皆從前濕蒸之累 氣升痰咳 參藥緩進。

炒川貝 茯苓 地骨皮 米仁 鬱金 淡苓

不飢 不欲納食 仍能步趨 長夏濕蒸著於氣分 陽逆則頭中脹悶 肌色萎黃 與宣氣  
方法。

西瓜翠衣 飛滑石 朱仁 蘆根 通草 鬱金

脈轉數 舌紅 面腫 消膚痛 汗減 耳鳴 咽嗆 肛痔 濕中化熱 乘竅 仍清氣邪 佐通管衛  
桂枝白虎湯主之

酒家濕勝於內 暑邪穢氣 亦由口鼻而入 內外相因 延蔓三焦 汗多 寒熱不解 非風  
寒從表而散 頭脹 腕悶 嘔惡 而渴不多飲 兩足反冷 是熱在濕中而來 古稱濕上乘  
為熱 不與傷寒同論

杏仁 半夏 茵陳 白菴 厚樸 廣皮 茯苓皮 六一散 鮮菖蒲

官宰術 三十 酒客多濕 腸胃中如淖泥 陽氣陷 血下注 王損菴以剛藥刮胃水濕

理中湯 加木瓜

無錫 三十一 夏月帶病 經營 暑濕乘虛 內伏 寒露霜降 天涼收肅 暴冷引動 宿邪 寒  
熱數發 形軟 食減 汗出 醫工治嗽 恐其胃倒 漸致勞怯 變凶





歸耆建中湯

向來下部赤痢。濕熱下注。本乎質薄腎虛。秋冬微感外邪。肺氣失降。氣隧為壅。水穀氣蒸變濕氣阻橫。漬經絡膀胱。氣痺。小便不爽。不司分別清濁。濕墜大腸。使稀痺塞。自下壅逆及上。喘息氣衝。坐不得卧。俯不喜仰。甚於夜者。濕與水皆陰邪。暮夜陰用事也。夫膀胱為腎腑。宜開則水通濁泄。初因外感。太陽先受。治不得其要。領孟予謂水搏激過額。在人身逆而犯上。射肺。則肺痺喘息矣。仲聖凡治外邪致動水寒上逆。必用小青龍為主。方與內經。腫脹開鬼門取汗。潔淨腑利水。相符。宗是議治。

麻黃 八分 桂枝 一錢 白芍 一錢 杏仁 十五粒 茯苓 三錢 甘草 三分

淡乾薑 一錢 同五味子一錢 搗碎一夜上午服

夏月足跗肌浮。是地氣著人之濕。傷在太濕陽明。初病失血。繼而嘔涎拒食。此脾胃濕傷。漫延乃爾。

五苓散去澤瀉。加 益智 厚樸 滑石 陳皮

東山 六十 血痺氣滯。腹中不和。而大便燥。夏季以柔和辛潤。交霜降土旺之候。連次腹痛。目皆變黃。此非黃疸。是濕熱瘀留阻壅乃爾。

炒桃仁 郁李仁 荒蔚子 冬葵子 菠菜葉

五旬外不得安間。凡勞怒煩動。多主五志之陽上舉。而肝膽相火為甚。幾年前製壯

水之劑。加磁石龜甲之沉潛。乃乙酉同治之義。今年暴暖多風。風熱上搏。清竅為蒙。濕熱蒸為膿水。此為客邪乘本體之虛。治標宜輕揚以清上。靜坐宅中。可以向安。

連翹 赤芍藥 草決明 羚羊角 薄荷梗 黃芩 山梔皮 荷葉梗  
飯後服。

裏真氣衰。不能貫通外膜。致聲若甕中。而蛙鳴蚊震之聲不絕。前之流膿水時。令癰熱氣加也。今議補下鎮納收斂方法。

龜膠 磁石 牛膝 牡蠣 遠志 菖蒲 淡菜 膠同蜜丸。

脈緩身痛。汗出熱解。復熱。此水穀之氣與濕併阻於氣分。鬱而成熱。治宜利濕。宣通氣分。濕去熱自解矣。徒清熱不應。

飛滑石 腹皮 茯苓皮 白菴仁 猪苓 通草 淡黃芩

舌白。渴不欲飲。嘔有痰。口味皆變。頭中空痛。兩頰赤。此水穀濕熱氣併鬱蒸腸胃。致清濁變混。忽然煩燥。難鳴苦况。法苦寒泄熱。辛香流氣。滲泄利濕。無形之濕熱去。有形之積滯自通。

淡黃芩 野薺金 川連 秦皮 白菴 通草 猪苓 厚樸

(十七) 感冒

尊體本陰虛。陽氣并邪觸發。熱二十餘日不解。蓋陰液枯。不能作汗。邪亦不解也。連



劑養陰之後。邪少鬆。則大汗泄。是雲行雨施。品物咸亨之候。何疑其脫耶。但弱體久病不解。元氣愈虧。此邪稍出。大汗作。亦屬接補闕頭。不容少懈耳。心靜則氣定而神住。切不可憂擾神氣。致陽上升。至嘔至喘。

人參

四錢

熟地

一兩

抱木

茯神

二錢

天冬

三錢

製首烏

五錢

病本溫濕。元氣不能載邪外出。有直犯中焦之勢矣。擬以梔豉。上下分開之。薑苓左

右升降之。芳香之草。橫解之。以冀廓清諸邪。未識得奏膚功否。

黑山梔

淡芩

川鬱金

生香附

炒香豉

鮮石菖蒲

生薑

甘草

暑熱時邪。病經二十日。諸法俱備。何必問途於蹇足。既承觸暑相招。勉爾揮汗撰方。

川連

半夏

淡芩

生甘草

茯苓

生薑

暑者。熱中之陰邪也。心先受之。侵入胞絡。怠惰不語。神昏肢冷。為不治。令脈遲軟。漸

有是機。四末漸冷。竟有內閉外脫之虞。急用通陽救逆之法。仿古大順散之義。未識

何如。

桂枝

半夏

焦白芍

炙甘草

陽明脈實。氣急而喘。壯火食氣。消燂真陰。夏氣開張而劇。剝棗時坦境也。此刻不能

他圖。姑與溫胆湯。少衰其熱。以保傷金。

溫胆湯



體盛之人氣必弱。寒熱乍起。即現小便短數。頭項暈動。舌乾齒燥。氣促。左弦右弱。渴不欲飲。皆元不勝邪之象。恐其乘津液之衰。遽爾內陷。宜謹慎斟酌。緣此時正當燥令故耳。

天花粉 卷竹葉 厚橘紅 麥冬 青蒿梗 六一散

脈數五六日不更衣。舌黃唇焦。胃熾矣。况前服之藥。皆辛溫耗陰之品。今非寒涼不可。然宜小心保護為主。因熱邪深入陰中。而陽氣獨亢故也。

川黃連 枳實 瓜蒌 赤芍 生甘草 陳皮 杏仁 木通

病久緒紊。終不離乎厥陰一藏。令商佐金氣以暗制之。滋營氣以撫綏之。實太陰以堵禦之。亦子貢存魯霸越滅吳之意。

羚羊角 人參 製首烏 清阿膠 麥冬 雲茯神

診得脈細數而微。舌乾黃。下利。身焦燥而不潤。此為下多傷陰。熱邪因之而內陷。大可慮也。治法輕以清其邪。苦以洩其熱。未識應否。

川連 小生地 人中黃 淡豆豉 木通 金銀花

昨所同議之方。以兩關按之。脈弦。特借仲景旋覆代赭法。同四磨飲投之。旋覆有旋轉之功。代赭為鎮墜之品。鹹寒可降。酸可入肝。四磨則漸磨運化。使手太陰得行清肅之令。足厥陰無剋侮之暴。今診得兩關弦象已減。面浮少退。是藥已應。而暴渴欲



飲則仍然如故。是則陽明之府。中垢不去。煎熬津液。下流一日不通。上流一日上泛。雖有補虛之策。孰敢泛投。且其虛脈虛象。顯然彰著。勢不容緩。前既借仲景之法。以退兩關之弦。此獨不可借仲景急去宿垢而存津液。然未可以子和霸法投之。擬以緩法。推陳致新。仍候昨日兩道長印可何如。

旋覆花

代赭石

人參同煎。送沉香化氣丸。二錢五分。

附錄葉香巖醫案以資對照

臍上心下熱熾。咽喉間陳腐氣。遂神昏撲厥經時。汗出而醒。口湧血沫。乃臍中熱壅。以致心竅受蒙。若非芳香清透。不能宣通絡中痰痺。

犀角

茯神

天竺黃

麝香

丹參

菖蒲

鬱金

冰片

各生研末。赤豆皮煎湯泛丸。竹葉湯送。

暑由上受。先入肺絡。日期漸多。氣分熱邪。逆傳入營。遂逼入心包絡中。神迷欲燥。舌音短縮。手足牽引。乃暑熱流陷。勢將發痙。熱在裡閉。肢體反不發熱。熱邪內閉外脫。豈非至危至急。考古人方法。清絡熱必兼芳香。開裏竅以清神識。若重藥攻邪。直走腸胃。與胞絡無干涉也。

犀尖

鮮生地

元參

銀花

石菖蒲

化至寶丹。

朱五十

半百已衰。多因神傷思慮。夏四月天氣發泄。遂加便溏。長夏暑熱。無有不大。





耗氣分寒熱之來。乃本元先怯。而六氣得以乘虛。今不思納穀之因。皆寒熱二氣擾逆。胃脘清真受戕。所以受困莫甦。不煩不渴。胃陽虛也。凡醒胃必先制肝。而治胃與脾迥別。古稱胃氣以下行為順。區區朮甘之守。升柴之升。竟是脾藥。所以鮮克奏效。

人參 茯苓 炒麥冬 大麥仁 木瓜 烏梅

瘦人陰虛。熱邪易入於陰。病後遺精。皆陰弱不主固攝也。泄瀉在夏秋間。是暑濕內侵。其間有瓜果生冷。不易速行。是中寒下利。什中僅一。况此病因遺泄患。虛病人自認為虛。醫者迎合。以致邪無出路。轉輾內攻。加劇。夫犯房勞而患客邪。不過比平常較勝。未必便是陰病。近代名賢。訛傳陰症。傷人比比。總之遺泄陰虧。與利後陰傷。均非剛劑所宜。當擬柔劑。以扶精氣。

人參 山藥 川斛 芡實 茯苓 生地炭

舌音強縮。乾涸無津。邪氣已入膈中。神識昏蒙。積勞心血及虛。致熱竟入矣。診脈虛小無力。但補則熱閉。今晚以至寶丹三分。涼開水調化。分五六次。銚服。明日再議。又心氣久耗。營液暗傷。漸枯涸窒塞。小腸火腑。失其變化傳道。澁溺欲痛。舌刺欲縮。色仍白晦。豈是血滯實火。當滋液以救燔燥。仍佐苦味以通火液。

鮮 浙江生地 元參 竹捲心 人參 川連 菖蒲 百部 桔梗

又神氣消索。五液枯寂。此昏燥妄言。乃陰陽不肯交合。欲作脫象。不忍坐視。議三才



湯以滋水源。加磁硃以寧神志。

三才湯加磁硃金箔

又吸短欲燥。午後至更深為甚。熱入陰中。子後清陽用事。稍和。自云心中不舒。熱熾則楚。做邪少虛多例。用仲景復脈湯。

炙草 生芍 人參 生地 麥冬 麻黃 阿膠 雞子黃

此吸受穢濁。募原先病。嘔逆。邪氣分布營衛。熱蒸頭脹。身痛經旬。至神識昏迷。小便不通。上中下三焦交病。舌白。渴不多飲。仍是氣分窒塞。當以芳香通神。淡滲宣竅。俾穢濁氣由此分消耳。

通草 猪苓 茯苓皮 米仁 淡竹葉 腹皮 至寶丹

熱久傷陰。津液不承。嗆咳。舌紅罩黑。不飢不食。肌膚甲錯。渴飲不休。法當滋救胃液。以供肺。惟甘寒為宜。

麥冬 南花粉 白沙參 冬桑葉 蔗漿

食菜下利腹痛。是初因寒濕傷脾。久變濕蒸。蒸於腸胃。況利後。痛不減。腹中硬起。不和。不得流通。明甚。當以苦泄小腸。兼分利而治。

川連 黃柏 苦楝皮 澤瀉 木通 查肉

口中乾燥。小水全無。泉源已竭。陰液無以上承。痢症噤口。都是濕熱壅於胃口。下元



衰憊衝脈氣震高突。此攻病保真。理難捉摸。

川連 草決明 石連 黃芩 烏梅 白芍

霉雨滂沱。咽喉暴痛。必因濕邪干肺。痛止。納食無礙。嚙水則噎。兼吐涎沫。此痺阻在喉。不在咽。仍以輕劑理肺。

枇杷葉 馬兜鈴 通草 米仁 射干 茯苓

陽微陰聚。致濁氣蒙蔽精神。苓桂不應。議用大半夏湯。合附子粳米湯法。

半夏 人參 白蜜 附子 白粳米

溫邪已入心營。神煩欲昏。質係陰虧。怕其液涸。不必以斑疹為慮。清神斯邪不結蔽矣。

連翹心 石菖蒲 鮮生地 元參心 金銀花 天竹黃 至寶丹 一粒

舌縮。語音不出。呼吸似喘。二便不通。神迷如寐。此少陰腎液先虧。溫邪深陷陰中。癰瘕已見。厥陽內風上冒。本質素怯。邪伏殊甚。實為棘手。議護下焦之陰。清解溫熱之深藏。以冀萬一。

阿膠 鮮生地 元參 鮮石菖蒲 川黃連 童子小便

脈濡。懶倦多汗。口渴。體氣素薄。炎暑燦火。當益氣保水之源。

麥冬 人參 知母 五味子



吳風溫上受。飲邪上泛。卧枕則效甚。飲陰類也。先以輕揚肅上。再議理飲。

桔梗 兜鈴 米仁 茯苓 通草 象貝 急火煎服一次

又紫輕可去實。恰當上受風溫。但左脇引動而效甚。經言左升太過。右降不及。然非肝木之有餘。雨水春木萌動。氣升上衝。皆血液之少。不主配偶之義。

甜杏仁 玉竹 甘草 桃仁 炒麻仁

暑濕未盡。清竅不利。自言神識如迷。夜不成寐。

竹葉 元參 連翹心 菖蒲 鬱金 川貝

長夏外受暑濕。與水穀之氣相併。氣阻蒸迫。上焦不行。下腕不通。不嗜飲食。目黃舌

白。邪結氣分。

杏仁 厚樸 茯苓 薏仁 炒半夏 薑汁

臭穢觸入。游行中道。募原先受。分布三焦上下。頭脹腕悶洞泄。以芳香逐穢法。

藿香梗 生香附 茯苓皮 白苳菴 飛滑石 炒厚樸 新會皮

病體已虛。風溫再侵。喘嗽。身熱腕悶。小便不利。全是肺病。此症反覆太多。深慮病傷

成勞。凡藥之苦味辛泄。有慎用。

青蔗汁 鮮枸杞根皮 玉竹 桑皮 北沙參 蜜炒知母 炒川貝

耳聾。環口浮腫。是少陽陽明風熱。久而失解。邪漫經絡。倏然疹現。隨沒。當與羅謙甫



既濟解毒湯

枯芩 大黃 防風 銀花 葛根 升麻 川連 荊芥 甘草

陳酒浸半日陰乾煎

身熱解墮惡風汗出如雨喘咳不任勞事內經謂漏風症此飲酒汗出當風邪留膝理也

白朮 澤瀉 麋銜草 新會皮

馬元儀先生治一客發熱煩燥胸滿中痛足寒自汗不寐口燥不欲飲診其脈右虛微此邪氣阻滯中焦以致陰陽不通上下不交也仲景云胸中有熱胃中有邪氣腹中痛欲嘔吐者黃連湯主之以其胃中有邪氣遏阻陰陽升降之機由是陽不降而胸中熱陰不升而腹中痛故用此以和解中焦敷布胃氣所謂欲通上下交陰陽必先治其中也今者元氣素虧邪氣得以直入陽明阻塞上下故口燥胸滿者陽獨治於上也足寒腹痛者陰獨治於下也陰陽既不和如此正宜用黃連湯以通上下但以煩燥自汗脈虛陰陽且有相脫之勢必於本方加入肉桂以補虛陽且倍用人參以助中焦樞運之機使氣和而運其陽之在上者得下通於陰陰之在下者得上交於陽陰陽既和邪氣自解且補不傷其滯攻不慮其峻為善法也方用

人參 乾薑 肉桂 川連 炙草 桂枝 半夏





其治一客外感誤治。紫云偶患風寒。誤投麻黃。汗出不止。語音短怯。神氣不收。面色枯白。時有寒熱。診其脈微瀼而虛。虛則氣少。瀼則陰傷。此元氣津液兩傷之候也。蓋麻黃辛溫。為發汗重劑。不當用而用之。不特刻其津液外亡。并元氣亦從此內脫。以胃中元氣。即養於津液之中也。神失而不收者。汗為心之液。心為神之宅。汗多則并傷其臟。而神為之收矣。時有寒熱者。氣入而陽往乘陰。陰虛不勝。則熱。頃之氣出而陰復乘陽。陽虛不勝。則寒。陰陽兩不足。則更實更虛。而不循尺度也。今之治法。當陰陽兩補。

人參 茯苓 製首烏 炙草 廣皮 半麩 白芍 丹皮

發熱惡寒。口渴胸滿。身中疼痛。晝夜煩燥。診得兩脈虛瀼。此積勞積鬱積虛之候。勞則虛。其中鬱則傷其上。虛則衰其下。由是風寒之邪乘虛內陷。乃生寒邪。邪氣既張。正氣愈虛。血不得榮。面色則黑。以陰氣素虧。則胸滿中痛。晝夜不寧。夫邪因氣入者。非解鬱則風不出。邪因虛陷者。非補虛則邪不達。治法先滋其上。次和其中。次補其虛。轉機用法。斯為善治。

瓜蒌實 炮薑 桂枝 桔梗 半夏 杏仁 蘇子

服後寒熱稍減。胸滿稍釋。而中痛未已。轉用

人參 桂枝 淡薑 川連 枳實 厚樸 半夏 炙草



服後諸症悉退。惟大便燥結不行。此勞鬱所傷。上中二焦之氣。漸致安和。而下焦積虧之氣未復也。

人參 秦艽 杏仁 製首烏 蘇子 廣皮 枳殼 半麩

又治一發熱惡寒。頭身俱痛。口中燥渴。時自謔語。兩脈洪數而濇。此是外感而病勢轉危者。以五志過極。陰氣素虧。邪復乘之。重傷其陰。而火熱愈甚也。用解肌湯服一劑。惡寒得已。發熱未除。讖語轉增。神魂飛越。是陰虛陽亢。法當養肝之陰。

生地 知母 甘草 茯神 丹參 貝母 花粉

葉香巖治陳某虛體感冒。七易方而始霍然。令將其醫案錄下。


陳診脈左帶微數。右關微弦。胸脘痞悶。右眼角赤。皆是肝木乘坤土。經旨有腎藏志。脾藏意。今夢寐驚惕。是見不藏之象。倘調養失宜。內有七情之擾。外有六淫之侮。再經反覆。藥餌無過。樹根草皮。馬能有濟。故重言以申其說。

人參 半夏 枳實 茯苓 乾薑 小川連

第二案六脈略和。舌苔已退。胸脘稍寬。渴飲至胃。微覺呆滯。大便乾燥。勢見陰枯陽結。通陽之中。佐以潤燥。亦屬至理。至於調養靜攝功夫。不必再贅。

柏子仁 茯苓 歸鬚 炒桃仁 塊苓 桂心

第三案立夏日診脈氣和。病情減清。晨微覺氣悶。陽氣尚未全振。再論人身中陰陽



二氣。嘗相眷顧。陽病久必傷陰。陰病久必傷陽。故病久之體。調養失慎。必至反覆。諄諄至囑。

進苓桂朮甘湯。以宣上高之陽。

第四案年過五旬。腎氣本弱。病纏日久。脾土亦餒。腎惡燥。脾惡濕。經旨昭昭。若欲平穩。宜乎分治為妥。是將來調補丸藥章旨。今上高已寬。宜進下焦調補為法。

茯苓 歸身 杞子 茯神 小茴 柏子仁 天冬 牛膝 巴戟

第五案病減六七。惟納食不易運化。飲食不易下趨。口中味淡。時或作酸。大便燥艱。乃脾陽不振。腎陰未復。故潤劑之中。佐以辛香。有合經旨辛甘化風之意。

柏仁 小茴 茯苓 車前 茯苓 牛膝 歸身 桂心

第六案脈神俱安。大便艱澀不爽。臍間隱隱作痛。高年腎陰暗虧。血液不能灌溉四旁。腸中枯燥。更衣頗覺費力。擬進通幽湯方法以潤之。

歸鬚 紅花 郁李仁 柏仁 麻仁 生地 升麻

第七案兩日連次更衣。臍間疼痛已止。胸膈之間。畧覺不和。則知病纏日久。不獨血液受虧。氣分亦為之不振。擬溫填藥餌。阻以通陽。庶幾中下兩顧。

茯苓 塊苓 杞子 小茴 柏仁 牛膝 人參 巴戟



稟性好食辛。醫書云。多食辛。令暴卒。今診得色脈形骸俱備。不須暴卒。亦不長生。宜自持其病。令先服三生飲。

生地黃 赤茯苓 麥冬 粉甘草 生米仁 紅棗

脈空弦。腹中急痛。肝病也。治肝不應。治脾亦良法也。

粗桂枝 一錢 沒藥 五分 白芍 二錢 炒黃 甘草 一錢 炒黑 琥珀 一錢 飴糖 二錢 半

(十九) 調補

滋榮養液膏

女貞子 廣皮 乾桑葉 熟地 旱蓮草 白芍 黑芝麻 枸杞子

鮮菊花 歸身 黑檣豆 玉竹 南竹葉 白茯苓 沙蒺藜 炙草

右前十四味各四兩。後二味各二兩。天泉水。桑枝火煎熬成膏。收入真阿膠三

兩。煉淨白蜜三兩。磁瓶貯好。每日卯時。挑服五六錢。開水送下。

此膏為林下服食之大藥。肝氣不和之妙品。貞連二味。法二至以暗轉陰陽。佐以桑麻。為調風氣應候。播植生機。助以杞菊。為升降之春秋。亦承流以宣化。歸芍辛酸。一通一泄。使無壅滯之情。地黃疾藜。一填一養。不致肌虛之困。檣豆滋水息肝。南燭培元益氣。茯神玉竹。為營衛報使。橘紅甘草。為喉舌真司。阿膠濟水。造成激濁揚清之凜冽。蜂蜜百花釀就。和風甘雨之仁慈。服之不特調元卻老。且以見天地之生生有



南京中醫藥大學圖書館藏

如是也。

心脾雙補丸

人參 元參 五味子 遠志肉 麥冬 茯神 酸棗仁 柏子仁

川貝 生甘草 苦桔梗 丹參 生地 川黃連 金華香附 硃砂 於朮

右為末。以桂元肉熬膏代蜜。搗丸如彈子大。每晨嚼服一丸。開水送下。

經云。女子以心脾為立命之根。凡心脾氣鬱。鬱則從火。久久不解。漸耗五陰。特製此

方。有通有補。允與丹溪立齋諸公相頡頏者。方義蓋取人參養心氣。麥冬益心津。生

地丹參玄參益心陰。茯神柏子遠志補心神。五味棗仁收心脈。川連甘草瀉心陽。桔

梗利心氣。硃砂鎮心怯。白朮健脾陽。香附暢脾陰。川貝療抑鬱。特重其數以對待心

脾二藏。龍眼代蜜。大補心血。甘草和脾。丸如彈大。細嚼吞下。不致直趨下焦。其功倍

著矣。名曰心脾雙補法。

中土以嵩高而定八方之位。是蜀在坤矣。毓斯境者。脈宜緩而流利。令洪搏太過。而

黃氣重。幸在浙已久。若處故鄉。是脈象當血溢。即日還蜀。宜早服丸以滋之。

六味地黃丸

清貴之脈。類多六陽。次則六陰。是皆純瀉之象。今體稟六陽。是一徵也。息分九候。位

分三部。雖一部之中。均察藏府。而左部顯然者。心肝腎三藏。今寸來空大。是心不藏





神也。關脈滑數。木無水養也。尺來浮大。水氣不衡也。火以木為體。木以水為母。先天一氣。由是通明。故知離中耦畫生陰。心氣日欲下交。坎中奇畫生陽。腎氣日欲上承。是即心腎一交也。丹訣云。水火交。永不老者。此也。無非尋常日用之間。心欲寧。肝欲和。腎欲實。庶無恍惚悸動。以及肢末不利。而四體泰然矣。謹疏一方。先滋營衛。頤養之法。再圖疏呈。

人參 棗仁 遠志 當歸 炙草 熟地 茯神 元參 白芍 木香

脈象較前稍和。兩手平均。俱就六陽本體。可卜無外來之氣。惟營衛少虛耳。但觀簿書旁午。是心陰不得不養。腎陽不得不藏。以供日用之精神。以副臨民之至意。先配湯藥。帶往省中。日進一劑。培補。隨配膏丸相繼。憲體精神。自當日臻康矣。

人參 棗仁 歸身 炙草 茯神 元參 白芍 杞子 熟地

胡桃 桂元肉

附錄葉香巖醫案於下。以資對照。

正當生旺之年。鬚蒼色變。按人身髮屬心火而炎上。眉主肝木而曲直。側生鬚。應腎水內不足而色不向榮。且脈象弱。乳男子精氣衰薄。不為生育之徵。法當寧心神。以處靜。寡慾養精。妙選無病瘦弱女質。經調怡悅。無拘慮愁煩。遵三十時辰兩日半之旨。庶幾望其毓麟耳。



肉蓯蓉 蛇床子 覆盆子 線魚膠 補骨脂 舶茴香 五味子 兔絲子  
 家韭子 沙蒺藜

